



03849

趙棗學公贖稿



卷緒中甲之四
浙江書局開辦

趙襄萇公贖藁目錄

卷第一

奏摺五章

呈一首

賦二首

頌二首

序六首

碑記三首

跋四首

贊七首

論二首

卷第二

趙襄萇公贖藁目錄

行述一首

祭文八首

卷第三

辛酉至戊子詩二百十三首


卷第四

己丑至庚子詩一百九十八首

古今詩文佳刻類多作者手自訂定其閒去留修飾以及魯魚亥豕必勘較無憾而後即安惟我

先大夫髫年握管治舉子業而外旁及詩古文詩每有所作援筆立就雖不甚點竄而要皆起草日積月累動輒成束辛巳以後隨侍

先恭毅往來楚越間奚囊書篋纍纍如也泊乎供奉



內廷從戎西徼與當代名公冢卿分鑣並駕凡所以詠歌

聖朝之德業紀載山川之土風應接士大夫之慶弔并或序一

事賦一物刻畫風雲草木之奇雕繪鳥獸蟲魚之態有動

於中則時時閒作總計數十年來詩文全集雖學力不齊

體格屢變然皆一時興會所寄每欲覓一餘閒流覽前後

諸作簡拔而編次之出以問世乃中道捐館遂不暇及而

篋篋所攜多散京邸其家閒故紙又半被六丁收去今數

搜括於灰燼之餘羅致於別見之稿竭力薈萃不過存什

一於千百又奚忍隻字捨置以增餘恫耶爰乃略敘年月

概存前後諸作閒有缺譌不補不改釐爲四卷以附

恭毅公贍稿之後雖未克如手訂之無憾而吉光片羽僅見

人間亦庶幾先澤之不盡亡云爾乾隆二年三月上巳不

趙壽公贍稿目錄

二

川文川

肖男個敬謹識

趙裘萼公贖藁卷第一

奏摺

恭謝 天恩摺



臣被花色參奏一案吏部議覆奉旨趙熊詔陳璋從寬免交刑部審理著革職解退起居注於伊等原走處效力行走欽此
臣聞命感泣如得再生伏念臣一介庸愚茫無知識 皇上養教訓已歷九年今以一言不慎爲同官參劾上負 主恩罪實難追復荷 聖明洞鑒矜憐寬宥仍令効力行走 臣之身家性命皆蒙 皇上保全感激有心悚惶無地爲此叩謝 天恩謹奏

直陳迫切下情仰祈 聖明鑒察摺

臣弟趙鳳詔重受 主恩居官不職乃蒙 皇上暫緩典刑差

趙裘萼公贖藁卷第一

員前往追贓罪臣得延一日之命皆 聖主弘開再造之仁上年五月中部員關係等至山西省城卽將鳳詔所有衣服杯緞等物傾銷變價不及坐贓原數十分之二已開冊報部續又將家人數十口舊衣服器皿書籍等項亦盡入官估變此外實一無所存鳳詔已受三次嚴刑絕而復甦現在獄中抱病親戚僮僕九人共經五十餘夾棍負罪深重雖闔門斃命亦有何辭但鳳詔所坐贓銀內有十三萬五千餘兩俱係猪羊米麪杯緞等物准折懸坐前年山西撫臣蘇克濟題參摘印之時當卽差委道府等官及巡撫家丁兵役同入太原府署搜檢只有現銀八百兩內二百兩係康熙四十一年 聖駕西巡恩賞鳳詔之銀其餘物件盡經點驗眾目共覩部員一到卽取出充贓如別有隱匿財物則鳳詔性命且不可保留之何用況家人疊受刑比

豈肯捨命而爲其主隱瞞今部員明知無物可追仍行拷問逼供鳳詔刑上加刑不待伏法必先殞命又部員以清查隱匿名色將山西省城內店鋪經紀及寺廟僧人逐戶搜拏夾訊監禁復行查通屬州縣地方合郡驚惶是因一罪人而株累無干之百姓鳳詔罪上加罪更有餘辜我皇上仁同天地明並日月凡臣下私情皆可上達痛念臣幼年喪母止有同胞兄弟四人一弟早亡僅存兩弟今鳳詔自作之孽命懸呼吸臣父趙申喬以七十四歲之老臣見此慘狀既不敢乞憐於君父更無顏忝列於卿班一年以來寢食俱廢形神憔悴臣目擊心傷情急勢迫不得不哀求 聖主之前臣知鳳詔坐贓銀兩粉骨碎身實難完納惟本籍江南地方鳳詔尙有受分田五十餘畝臣亦有田二百畝請 敕下江南撫臣清查一併變價入官倘蒙

趙壽公賸囊卷第一

皇上矜全免死舉家盡戴 天恩即使罪在不赦來生亦效犬馬冒死陳情伏祈 聖慈垂察爲此激切謹奏

泣謝 天恩摺

臣在肅州八里坤軍前効力走差康熙五十九年十一月二十日甘肅撫臣綽奇接奉撫遠大將軍王諭奉 旨尙書趙申喬於十月二十四日病故伊子趙熊詔令其自己力量星速回京欽此本月二十一日撫臣行文涼甘肅三道轉咨到臣聞 命之下五內摧裂痛不欲生卽於二十二日自備腳力起程星速來京伏念臣父生前受 恩深重報效未終沒齒遺恨仰荷 聖明俯加優卹又憐臣父子永訣不得一見 特旨令臣回京

得以料理臣父身後諸事 皇上曲體下情仁至義盡 洪慈

破格感激難言臣尙未到家先匍匐叩首泣謝 天恩謹奏

叩謝 天恩摺

內閣大學士奏請 欽定 臣 父趙申喬諡法欽奉 賜諡恭毅 臣 聞 命之下痛心飲泣伏念 臣 父生前受 恩深重臣職未 終今身後復蒙 皇上優卹 寵錫榮名流光奕世古云知臣 莫若君 臣 父一生立心行事仰邀 聖明洞鑒盡在 欽定兩 字之中九原有知自當感涕至 臣 合家兄弟子姪頂戴 主恩 非但力不能報亦且口不能言惟有焚香虔祝 萬壽無疆以 效犬馬之微誠耳為此叩謝 天恩謹奏

主恩未報臣命垂危伏枕哀鳴謹瀝愚忱摺

臣 草茅下士忝中康熙四十八年第一甲第一名進士蒙 聖 恩高厚獲侍禁近時覲 天顏屢加賞賜又超陞翰林院侍讀 隆恩異數刻骨難忘 臣 秉性愚昧自干罪戾幾入囹圄蒙

趙襄勇公賡墓卷第一

三

皇上特為寬宥保全性命每一念及感泣不能自己 臣 在肅州 軍前兩次解餉巴爾庫爾冀效手足之勞報圖萬一 臣 父歿後 大將軍王傳奉 諭旨令 臣 星速回京 臣 於 臣 父未能親視舍 殮幸得扶柩歸返故土不意 臣 於七月十七日到家即患喘嗽 迄今八月十五日未及一月奄奄待盡從此永辭 聖世犬馬 之報願矢來生至 臣 子侗敦蒙 皇上南巡 欽取修書議敘 知縣幼子仔敦國子監生 臣 惟囑 臣 弟戊子科舉人 臣 鯉詔率 臣 二子勉圖報效以繼 臣 父未盡之志抒微 臣 欲報之衷 臣 伏 枕叩首口授 臣 子侗敦繕摺謹奏

呈

懇甘撫代題為 君恩高厚已極臣心感激難言籲懇代

題恭謝 天恩事呈

竊熊詔奉 命效力軍前離京幾及萬里父年已近八旬每得家書聞父精神日減氣血益衰熊詔兩奉差委解餉巴爾庫爾長途往返魂夢不寧今年五月回抵肅州始見邸抄父有微臣衰老等事一疏奉 旨卿効力年久清勤自勵簡任司農正資料理著照舊供職不必以老病求罷該部知道欽此又見父有微臣衰病等事一疏奉 旨前以老病求罷已有旨了著在任調理照舊供職該部知道欽此又奉 上諭前日覽戶部尚書趙申喬辭本朕深憐之念其操守到老清廉性雖暴躁爲人樸直年近八旬病勢難料全愈倘一時難保亦未可定趙申喬乃革職留任之官著照陳詵之例復還原職當賠之銀一概寬免內閣將此口傳旨意著速發去令病人早知十天或五天少得安寧服藥調攝即可頤養也欽此熊詔跪誦 溫綸淚隨聲下

趙襄謨公騰囊卷第一

四

旋又接父手信云近日腹瀉稍止但苦足痛難行肌肉消瘦蒙

皇上曲加憐念 恩旨頻頒俱出望外仰仗 聖明洪福調

理可以漸痊恐熊詔聞信焦心手書示慰等語熊詔驚魂始定感極涕零伏念父子世受 主恩豢養教訓矜恤生成此日身

家性命無一非 皇上之所保全今又憐父老病 天語丁寧

聖心周至卽慈父之愛嬰兒不過如此凡屬臣僚盡爲感泣況於身荷 隆施雖捐頂踵難報 高深惟有焚香虔祝 萬

壽無疆父子世生生長爲犬馬以盡力耳查士民感沐 皇

恩亦有據情題達之例熊詔原係 內廷行走之員今遠在軍

前不能面奏下悃謹望 闕叩頭理合呈請代題恭謝 天恩

爲此激切具呈伏懇撫部院查照施行

賦

九龍山賦

毘陵之北有九龍山與黃山孤陳山相接而錫之慧山亦名九龍考諸郡國志及陸羽記皆合二山名雖同然攬勝者多稱慧山蓋慧以泉擅名宸遊駐輦寵以御書是蛟龍而得雲雨也譬諸兩韓翊在前必取作寒食詩人矣因爲之賦曰

維斗宿之分野兮步武蒼龍之後故神龍縱其出沒兮俾山川其挺秀旣蜿蜒而爲六兮復天矯而爲九錫山之西慧山在焉舊號九龍厥狀云然層巒伏而忽起疊嶂斷而猶連九澗環其下九峯據其巔恍蒼虬之鬪野儼文螭之負天爾其下瞰五湖俯臨眾阜萬頃琉璃一碧軒牖大雷小雷如在左右聳壑昂巖爲龍之首若夫嶺黛橫鋪岡雲斜曳霧鎖峯腰烟籠岫額朝暉

趙夢雲膽囊卷第一

五

八

乍迎晚翠欲滴萃帆參差爲龍之脊迺其梵殿我我流觴曲曲洞號仙人之居坡名孝子之築千葉兮蓮花一池兮錦韞掩映樓臺爲龍之腹若其倒峽留雲迴峯帶雨落雁字於坡中織魚梭於澗底拂小塵於千尋掉長虹之萬里如有如無爲龍之尾至如中嵐弗鬱危磴嵯衍叢篁巢翠灌木栖鴉一層兩層兮峻岫怪石五出六出兮搖曳山花極千態與萬狀爲龍之鱗甲與爪牙別有石穴淵淵石乳涓涓品由陸子題曰二泉苔封兮古鬢雪濺兮亭軒行行兮白玉筋點點兮珍珠簾金蓮沼中似承仙掌之露若冰洞口疑探星海之源此又龍之領下珠足以與雲噴雨於九天者也故其谷連嶂崿互舜柯南北延袤有如龍臥襟環孟野肘抱秦園縈紆繚繞有如龍蟠蓉湖爲鏡膠山作屏浮青湧碧有如龍騰雨後垂蘿風前捲籜怒石攢崖有如

龍攫幽澗響冷泉鳴千年松吼萬壑濤奔天籟四起有如龍吟
是皆山中之勝景堪豁目而賞心則有松菊高人菰蘆逸士芳
草王孫芝蘭公子半榻山寮一帆蕭寺於是躡謝公之屐掛阮
子之囊拂荀令之席登庾老之牀泛玉川之椀引右軍之觴投
賀監之金龜解相如之鵲鷄攜大蘇之小團月酌太白之紫瓊
霜眺李丞相之書臺訪湛長史之草堂黃公澗畔啼春鳥秦皇
鳴下咽寒螿蓮荇塘邊浣紗女薜荔坡前鬪草孃掃山眉於裾
袖牽水鏡以縹緗斯卽衡湘九轉之面武夷九曲之岡亦未足
擬乎是鄉者也吁嗟夫此山無靈巖邃洞瀑布建瓴之紀勝亦
無修廊曲檻奇葩異卉之飾觀一經鴻漸品題之後遂使伯仲
中冷頡頏簾谷而擅名吳會之間然亦止伏龍之月旦未增重
乎名山迺以 萬乘來遊六龍翩翩停仙仗駐鳴鑾潑 御墨

趙葵公騰臺第一

六

灑 宸翰筆翔蚪斗紙落雲烟錫爾嘉名界以品泉問山靈之
何幸兮遇飛龍之在天方不愧乎九龍之號兮行恐其乘風雨
而高騫

江天一覽賦

鐵甕之西大江之支洪濤澎湃峻湍漩滲吞吐靈潮噴瀑千磯
懸崖雲矗斷岸虹飛江名揚子泉號中冷眾峯環遶迅瀨滌滄
其中有金山焉蒼翠萬狀突兀嶙峋烟嵐如畫灑黛浮青岑崑
茆鬱岡巒糾紛含谿藏霧觸石吐雲湧波心而立鵠疑廣眉之
照人山之上 有寺橫橋欹磴曲檻層城蓮棗藻稅玉舄金楹參
差寶塔上出重霄縹緲琳宮下臨無地臺曰妙高旁開側嶺亭
曰留雲巍峩聳峙裴頭陀之所得金陸茶顛之所品味蘇學士
之玉帶永鎮山門了和尚之禪牀一塵不寄俯瞰江流則穿渠

漫汗平眺長空則極目萬里信江天之一色可一覽而盡矣爾
乃金飈方退玉露猶凝遠天賓雁溟壑搏鵬瑤花飛而積雪水
葉落而堅冰具若此之壯觀宜應候而登臨時值 聖駕南巡
鼓柁中洲鬱鬱蔥蔥若沉若浮潮平麓坦擁護 宸游於是
天子戴翠帽御雲裘駕鳳輦纏龍舟命陽侯以開徑召山靈以
導朝騰千騎而雜遝扈萬乘之驂旂迅翠華之辰止駐警蹕於
山頭俯雕甍凭碧螭陟崇阪籠絕岫岡阜曠其顧盼川澤弘其
盱覲閱天高與地迥眞一瞬乎宇宙近而視之若瓊林琪樹映
曦暉於瓊圃遠而望之若珠樓玉宇啟金銀之瑞圍飄忽兮若
廣寒清虛之府皎潔兮若白雪陽春之晝趨方丈與蓬萊渺天
池與靈鷲至夫漻漻瀨瀨瀚瀚瀾瀾潮汐驚浪雷奔駭濤電掣盤渦
谷轉捲瀾岸磧天輪觸而下垂地軸迴而上揭扶桑翔於鮫宮

趙襄公賡襄卷第

七

望舒馳於鼇窟清風起而滉漾陰霧蔽而噓喻海童乍出以閃
爍天吳隱現而髣髴冰夷倚湍以傲睨江妃含顰而睇絕琴高
天矯以凌波岷精垂曜而澄澈介鯨激石兮瀑沫江豚隨風兮
出沒鰓鰲揚鬣兮漂泊駉馬掉尾兮跋躒月珠含蚌兮爭光冰
晶麗蜃兮炫睫芳蘿叢生兮島中水松隱藹兮汀側蘆荻搖漾
兮遠涯蘭茝蔓牽兮潯澤楓垂紅兮極浦梧映碧兮遙隰固靡
境而不矚亦靡景而不挹若乃廣莫不翔五兩輕颺驅舩旌漂
餘艫牙檣錦纜金牛呂梁舳艫連屬桅帆相望運天儲于 帝
京輸玉粒於神倉迅如晨霞孤征渺若雲翼飛揚登高而俯見
宛似掠波之鷗鷺而戲水之鴛鴦更有釣艇羅筌漁舟奪鮮采
恩夾溲罾雷並舩或投綸於鳧渚或結網於鱻淵或飄蓬而銜
艘或中瀨而橫旋爾且鼓蘭橈排畫舫紛紛兮錦標燦燦兮彩

崩金鼓喧闐兮乘風波浪旌旗蔽天兮鬪紫流黃勝觀之已極
兮復何羨乎瀟湘於是縱目八荒山水蒼茫丹灤朱滄縈其宅
具區洮涌互其旁白馬射陽供其映帶芙蓉長蕩接其濫觴望
焦光之廬瞻招隱之莊盼羅浮之頂睥崑崙之岡睇黃鶴之峯
矚九龍之障睠乎其左瞬乎其右瞪乎其前瞠乎其後峩峩之
影若接玉壘之雲待收日下之長安不遠星漢之支機可求指
北辰通南宿窮東溘竭西陬識乾坤之浩蕩恍天上以遨遊
天子顧而樂之曰是江天之勝境也不可以無誌時乃潑 御
墨揮神鋒落蝌蚪走蛟龍丹鳳篆紫泥封暢一覽乎空碧爰鐫
石於亭中

頌

擬漢華平頌

趙襄貴公騰藜第一

八

元和中華平出郡國按張衡賦曰植華平於春圃固瑞
木也王者有德則生其枝俯仰可驗君德之剛柔不
僅瑞木且聖物矣與冀莢屈軼可相頡頏眞太平兆也故
爲之頌頌曰

眞人繼統禎祥畢呈九州向化萬物咸亨垂裳曰聖靈枝故生
非號奇木不比芝英春圃是植厥名華平圃柯皆坦拱幹無傾
渾疑蕉葉純似浮萍翹翹而歧其氣向榮芄芃而盛其貌橋衡
以占君德惟剛克成岐山之陽梧桐鳳鳴西土壽考棫樸縱橫
山榛隰苓美人繫情芳蘅香茵碩士馳聲獨此瑞應海晏河清
一人有道四海無兵疇庇靡涯膏雨自盈不才獻頌聊作稱觥
序

恭擬朱子全書序

朕萬幾之暇卽於四子六經研精覃思深見治國平天下之理本於誠意正心惟孔子立其教而朱子闡其訓故遍覽儒先諸書尤心好朱子蓋朱子之爲言也凡理氣之流行鬼神之情狀綱常性命之原歷代盛衰治忽之故百家二氏之異同以及天文地理山川草木鳥獸之名象義類與夫禮樂兵農刑政諸大端靡不兼綜條貫探賾抉微本末咸該鉅細畢舉昔人謂孔子集羣聖之大成朱子集諸儒之大成非臆論也今其傳注章句班班具在而其他散見於語類文集遺書數編非廣爲蒐討恐有闕遺朕欲成朱子全書以表章集大成之意初命大學士熊賜履校輯甫屬藁數帙而罷復命李光地踵成之博採類纂每一帙竟卽令進呈親覽編定書成迺鳩工內府刊刻之字畫句音微有譌漏悉加修改校讐必嚴雕鏤必精明所重也朕於是

趙葵書公牘藁卷第一

九

古文上

書手披口誦歷有年所矣因思大道待人而行自堯舜以十六字傳心禹湯文武遞衍其緒數聖人相與懋建人極主斯道於上精一執中之統如日中天千五百餘年而不晦皆古之爲帝王者以身任道之力也迨乎孔孟則道在師儒聖賢旣往微言將絕漢唐諸子無實見道體者有宋眞儒輩出倡正學於世遠言湮之餘而著書立說發蒙振聵先聖之道燦然復明豈非帝王所不能任者而師儒任之歟然朕觀諸儒所言或近於偏倚或失之踳駁惟朱子之書粹然一出於大中至正而無復有大醇小疵之憾且其爲說不徒託諸空言而實可見諸行事朕每讀其書做其意而行之皆有徵驗信乎孔孟以下一人而已夫以朱子之言論深切著明如此宜乎聞之者無弗眞知篤信如菽粟布帛之不可離規矩準繩之不可易矣然當時君相不能

行其言而陸九淵王守仁輩後先唱和執主靜良知之說分幟而樹之敵甚且深詆痛毀抑又何也夫亦未嘗備攷其論議學術之源流而見理不真則聞言不信歟程子有言曰天下之學非淺陋固滯則入於佛老之虛無朕縱觀典籍曾亦旁逮佛老見其說自顧一身則有餘施諸天下國家則一無所用而世之學佛老者更失其宗旨襲其膚辭險詖幻誕歸於無忌憚而止是故朱子一生力闢異端窮理躬行總以居敬爲主堯舜曰欽禹曰祇德湯之聖敬文武之敬止敬勝皆是心也朕君臨天下五十餘年於敬之一字頗有體會雖不敢自謂有得於堯舜禹湯文武之道而讀朱子之書益信千古聖賢其道同其心同也遂撮其大要而序之俾天下後世讀是書者咸知所折衷焉

恭擬周易折中序

趙善公讀易卷第一

十

八十一

自義文周孔數聖人相繼而興易之書始成易之道始備大而三才萬物小而一器一名微而窮理盡性顯而經綸參贊無不包舉乎其中故大傳曰廣大配天地變通配四時又曰變動不居周流六虛此作易者所以爲聖而言易者蓋難乎爲其言也由漢而下田孟費鄭之學出人自爲師家自爲說厥後王弼孔穎達爲之注疏語尤龐雜至於京焦之卦氣衛嵩之元包皆假借乎易而於易相去實遠蓋易之理千變萬化無所不該故人人可竊其緒餘成一家之言亦惟易之理一中而不可過差故後人之詮解愈繁而古聖之心傳愈晦迨宋程子作傳朱子作本義而晦者復明然朱子猶以程傳止言理而不及象數爲未愜故曰易爲卜筮而作離卻象數不得也甚矣言易者之難也朕蚤歲嗜書諸經無不覽誦而最愛讀易常就其本文沉潛玩

索有契於心復博觀羣書旁考眾說凡於易理足相發明者咸
擇取而默識之研思不輟已五十餘年大學士李光地深於易
學老而不倦每進對之頃朕與之講易輒欣然若聞所未聞因
相與商榷稽訂以本義爲宗程傳爲輔更採輯諸家論說之精
粹者綴於下其有疏解異同或義蘊未盡者則爲案語以參補
之經文十翼次第悉從古本且先之以綱領撮舉作易讀易之
大指也附之以啟蒙闡明畫卦揲蓍之本原也益之以附論見
天下方圓乘除循環動靜之數無不起於河洛也終之以明義
見序卦雜卦之先後錯綜皆有精義存於其間也書成統計若
千卷名之曰周易折中蓋易之爲書以變易交易而成中也者
不易簡易之謂也理求其確言軌於正斯簡易而不易矣朕於
是編披覽再四晨夕寒暑未嘗少懈數易藁而後定豈敢謂羲
文周孔之祕奧盡乎此哉亦庶幾使天下後世之學易者如射
之有鵠如測景之有標準皆視一中以爲歸不至惑於歧趨而
誤向焉此則朕之志也夫

重刊夏忠靖公集序

士君子經世之學必其所見者大而後極天下艱鉅非常之事
集於其躬可以從容應之而不亂而其發爲言也亦皆本乎至
性形諸至情粹然儒者之言不假雕琢而自得乎風人之旨故
其人傳其文亦傳夫子曰有德者必有言蓋言者心之聲仁義
之人其言藹如也勝代名卿賢相楚產最盛而君臣相得直追
都兪喜起之風功名始終無毫髮遺憾者惟夏忠靖劉忠宣兩
公有焉忠靖籍湘陰忠宣籍華容地之相去不遠也忠宣在孝
廟時軍國大事悉咨議而後行言聽計從得君矣而未及相忠

靖歷事四朝職雖農部實兼九卿之任仁廟時進少保宣宗時復念公春秋高俾輟部務專論道左右則隱然爰立之意也余嘗訪二公遺集不可得嗣得忠宣遺藁於其裔孫學坦孝廉迺鈔本未授梓寥寥不數篇存什一于千百而已旣而湘陰學博詹孝廉以重刊忠靖集請序於余予喜若獲拱璧受而卒讀如見公之爲人因歎公立朝幾四十年器量宏遠而遇事能斷鎮定不撓雖賁育無以奪之蓋其爲國爲民所見者大而不在于區區利害得失閒也公之輔監國治水患大績具載史策弗暇更僕數觀其進言於君將順匡救不爲激直之詞似乎以柔克者然奉命拜西域法王竟長揖不屈及諫北征受命整邊儲尋遣錦衣召還趣行甚急公徐徐俟治粟畢方行至御前極言宜修內治不當勤遠略歷數古今成敗持論侃侃不少變又何其強

趙襄公騰囊卷第一

三

八文三

哉矯也當是時國家方繁費動以億萬計公盡心理財一切調度無弗給者嘗取天下賦役糧儲之數書小帖置袖中及顧問縷縷條對不失僮黍至其治水東南也有言水退田淤可召民佃耕以益國用者詔問公公以民疲已甚不堪重役亟馳奏之事得寢嗚呼非深識遠謀不爲利害得失所動搖者惡能若是士不可以不引毅如公者可謂弘與毅兼之矣所著詩文樸而雅莊而溫天真爛熳辭達而止顧其忠君愛國仁民利物之意已洋溢楮墨間有德者之言宜其然也抑公尤篤於孝友母太夫人歿公方坐繫仁宗卽位急出公令視事泣請終喪疏十餘上不允嘗夜哭聲徹廳事間兼食兩俸任其季弟取之不復問每有賜物必捧而泣痛太夫人之不及見也必以分遺兩弟故集中思親寄弟諸詩尤悱惻動人然則公之德被生民功施社

稷不動聲色而措天下於泰山磐石之安皆其天性過人立本
以致用者也而士君子有志於不朽之業者本之不立遑問立
德立功與立言哉余既景仰公之爲人而復嘉學博之能網羅
舊聞表章先哲也爲書數言於簡端庶幾後之君子覽觀而興
起焉

鏡彙序

昔唐太宗曰以鏡爲鑑可照妍媸以人爲鑑可明得失然則鑑
於鏡曷若鑑於人哉而以人爲鑑者莫如史蓋上下千百年氣
運之升降國家之盛衰君臣政治之美惡與夫人之邪正事之
成敗無不呈形肖象於目前一覽而可辨猶明鏡當空萬物羣
品紛然雜至而莫之能遁也近世士大夫研心史學者絕少謙
牧先生以勳舊世家被服儒雅篤好典墳其詩文筆墨妙天下

趙紫翁騰篋卷第一

三

而尤嗜讀史於朱子綱目一書反復披省歷有歲年深得其褒
貶勸懲之大旨藉以檢身考道孜孜弗之釋顧恐學者苦其卷
帙浩繁茫茫乎不知畔岸或至於困噎而廢食也爰是循其條貫
繫其要領句刪而字節之期於事詳詞簡而仍無挂漏之病錄
成若干卷名曰鏡彙先生之意蓋謂以多爲彙不如以精爲彙
也譬諸鏡大則其光散而對鏡者目不暇給鏡小則其光聚而
千態萬狀不轉瞬而畢見焉庶幾讀是書者開卷有益不患乎
掩卷茫然矣書曰辭尙體要孟子曰博學而詳說之將以反說
約也是編也要歟約歟其眞明鏡不疲於屢照者歟

秦紫銘窗稿序

胸中有萬卷書筆下無一點塵斯二語蓋相對而實相因者也
古人於書無所不讀挹其菁華發爲文章故能吐棄一切自成

杆軸今之學者專攻一經猶不成誦其他間有涉獵亦生吞活剗未嘗融洽厭飫於心雖臨文構思而莫爲之用無怪其筆之所至塵滓盈紙瘠者槁頰而菜色肥者亦饜養於糠覈而已安能斟酌飽滿蕩滌埃垢而驅筆下之塵哉吾邑秦子紫銘績學工文鬻序最有聲余違故鄉已久耳其名而未覩其面未覩其文己亥之夏奉 命從戎於酒泉秦子亦偕其友至出一編示余乃其歷年所爲制舉業也余受而讀之甫入目卽灑然改觀篝燈卒讀悅而忘倦蓋其天分固高兼以經子史羅列胸中下筆時絡繹奔赴故吐屬純乎卷軸之氣觀其文而其平日之讀書嗜古可想而見矣且風格非一種因年而進研辭鍊句淡而彌腴險而不詭視彼時流俗好挾兔園冊子相誇者若將浼已然今秦子年方壯更能加膏希光以造於大醇無疵之域其所詣又止是乎哉或有諷秦子以貶技逢時者余獨以爲不然遇合有數存焉寧爲不知者所棄毋爲識者所嗤少陵云文章千古事得失寸心知吾誠有得於心而益精其學則吾之自知既眞天下之大未必其無一知我者相賞於風塵物色之外也奚以貶技爲

涼莊何參藩母陶太夫人八十壽序

嘗讀小雅四牡之詩曰不遑將母又曰將母來諗古人勞於王事而思念其親如此其至也夫庭闈之內朝夕周旋牽鞵鞠臚舉觴上壽身當其境者直尋常視之不自覺其樂一旦經營四方馳驅萬里瞻望白雲遠違子舍然後歎天倫聚順之爲眞樂而承歡色養爲人生不易得之事也雖然爲子者旣以父母之身出而事君則國爾忘家亦人臣之分幸而自天佑之使其親

康彊壽考見其子之致身盡瘁移孝作忠鄉黨稱之閭里慕之
海內之士得交於其子者爭數千里馳詞以祝之其顯親榮親
不猶愈於俛仰膝下名湮沒而弗彰者乎若何母陶太夫人誠
有足壽者焉母出會稽望族嬪於何今涼莊參藩湘翁其子也
余與參藩交最久且深聞其述母之德甚詳如守志撫孤刲股
療姑諸大節傳播吳越間人咸能道之跡其生平大槩蓋能事
尊嫜以孝相夫子以敬待姻黨以誠御子婦以慈而治厥家以
勤且儉也參藩筮仕廷評出爲監司皆恪秉母訓歷有政績涼
莊報最已遷秩矣適以西域小醜上干天討大師雲集塞外
一切徵調轉輸惟參藩擘畫而贊襄之以故留任不去復移駐
酒泉指揮談笑顧盼自雄其意氣之盛可謂壯哉顧念太夫人
之在南也迎養則不能乞歸則不可日月云邁每忽忽如有所
失而太夫人郵書慰勉勿以老親分乃心參藩亦奉命惟謹今
太夫人年八十矣設悅之辰正屆重九識者曰九陽節也重剛
而數不窮女而有土行者當之必其德性堅定精神強固有永
錫難老之徵焉他日參藩功成受上賞書錦而歸更爲母稱百
歲觴其所以報母氏劬勞之恩而仰承聖天子以孝治天下
之心者固自有在今日將母之思於是乎大慰也已余與參藩
共事戎行不獲登堂而祝特以是言爲壽太夫人聞之當必道
然而進一觴也

碑記

重修東林書院碑記

東林吾道中一赤幟也自龜山先生以道南一脈倡於毘陵講
道城東隅一十八年從游者雲集梁谿之東林於是乎得名厥

後歷宋季元明四百餘年不絕僅如綫弘治中二泉先生起而
修復之至萬曆甲辰涇陽先生偕景逸先生輩尋其遺緒而光
大焉會吳越士講學其中而東林大振雖然清者濁之仇也正
者邪之敵也諸君子既以其絃歌誦讀之身明正誼樹清標則
邪濁之小人自羣起而與爲難書院之毀於逆璫也理勢必然
固無足怪當魏崔煽焰時海內承望風旨以東林爲眾射之的
喙如矢集諸君子幾不獲免曩時絃歌誦讀之場一旦鞠爲茂
草及其敗也浮雲盡皎日明諸君子幸而有以自白然老成凋
謝先民有存什不得一二僅從殘垣敗瓦中歛噓憑弔曰某堂
某室昔日諸君子杖履所優游也某齋某戶昔日諸君子班荆
論道處也而今安在也蓋東林之不振亦已久矣意者清流之
輩造物亦嫉而忌之耶抑成毀有數一興一廢而不可常耶顧

趙葵謗公廢卷第一

七

八

嘗按其本末考其盛衰東林何以崛起於萬曆之季也神廟晚
年倦勤世教積而士習壞諸君子退而藏修兢兢焉持一身以
爲之砥也不幸奸人志得而東林摧東林摧而奸人之焰益熾
而不可遏迨信王繼統破邪謀擯逆黨而東林之聲氣乃復伸
於天下是其一廢一興實爲前明二百六十餘年剝復否泰轉
移之一大關然則居今日而圖修復者非有名公鉅儒與昔日
諸君子臭味相孚而又適當夫正學昌明之會孰能微顯闡幽
振遺風於將墜乎潛庵湯公以閣學來撫吾吳毅然以修舉廢
墜爲己任至梁谿訪東林遺址因鳩工復其舊迺堂迺構不崇
朝而告成凡龜山以下諸君子皆尸祝其中歲時俎豆不絕邑
之人遊其地者瞻拜之下肅然改容曰是殆公之藉以教我郡
人者歟噫公之意念深矣夫東林之在當日議論不無偏激氣

節不無過高然謂之非中行則可謂之非狂狷則不可江河日下賴此數君子爲之維持其廉頑立懦之功誠不在夷惠下公之意其在斯乎公固中州鉅儒也潛心理學有年其於道南一脈蓋有深契焉斯役也所補於世道人心豈淺鮮哉今中丞宋公繼撫我邦益力表章其事公與湯公固同郡人輝映後先若合符節於是三吳之士交口稱之曰東林諸賢得二公而益彰也或曰二公之嘉績藉東林而益傳也子獨以爲不然夫闡揚名教以維風善俗者大臣之職也崇尚實學振興儒術俾臣下得以承流而宣化者 聖天子之德也假使黨人有碑南北部有議則賢士大夫且引嫌避咎不敢與李范齊名矣而何有於東林敬以質之公公曰懿哉斯言遂書而鑱諸石

恭擬重修西頂廣仁宮碑記

趙壽公臚書卷第一

七

八二文

天地之大德曰生在四時爲春在四德爲仁大易曰元者善之長也君子體仁足以長人自古帝王茂對育物使四海之大萬民之眾以及昆蟲草木之細各遂其生者無非體天地好生之德推而廣之以流澤於無窮也然易之繫辭言乾大生坤廣生則是生物之功天始之而地更廣之蓋坤者母道也母道主慈其於生物尤近是故崇祀報功之典必以子惠吾民者爲重焉京城西直門外有西頂舊建碧霞元君宮西山環翠玉泉映碧林木蒼翠烟靄縱橫固郊畿一勝境也元君初號天妃宋宣和間始著靈異厥後禦災捍患奇蹟屢彰下迄元明代加封號因是都人多爲立廟請祈報賽之禮歲時勿絕而西頂其一也廟久漸圯椽桷弗整墁堊弗新其謂安神何歲在戊子發帑金命有司鳩工重葺之帑一載而落成棟宇穹然垣墉翼翼然殿寢秩

然丹腹燦然瞻拜其下者虔肅有加焉朕於萬幾之暇亦往展禮爲 聖母祝釐爲蒼生徼福迺顏其額曰廣仁宮羣臣請立石以紀之朕思仁之爲道大矣擴之可放六合約之止在一心先儒論仁謂心如穀種其生之性卽爲仁故物物而有仁則生生而不已天地之生物父母之生子皆是道也朕君臨天下日以養育羣生爲念俾穉者得以長壯者得以樂老者得以安期於生齒殷繁兵刑寢息民無天札物無疵癘總以一仁推之而有餘今獨於茲廟曰廣仁者蓋以元君之爲神有母道焉母道莫大於坤惟元君其佐坤之厚德以廣其仁庶足以食報永世云

巴爾庫爾關廟碑記

巴爾庫爾關聖帝君廟迺靖逆將軍吏部尙書富公駐兵時所

趙襄公臈卷第一

大

6001

創建也易之彖傳曰聖人以神道設教而天下服蓋神之爲道卽人心之靈爲之聖人設教不過因乎人心之所同然而動乎其所以不得不然是以下觀而化也今 聖天子仁壽合天覆育

萬類中外一家遐方絕徼罔有不庭蠢茲小醜阿喇布坦恃遠背德侵陵外藩 天子軫念遠人皆吾赤子不忍聽其自相戕

虐遂命公統領滿漢蒙古諸軍駐於巴爾庫爾聲罪致討將士人人自奮欲殲此而朝食 天子復不忍遽加翦薙姑緩師以俟其悔罪來歸數年以來土馬之雄甲兵之盛芻茭糗糧之廣

饒豈有待於神力之佑助哉然而 天戈所指萬靈呵護神人

協應幽顯同揆况關聖帝君忠義大節炳天日而貫古今當此

小醜遊魂大師雲集之地有不日鑿在茲而輔相 皇威者乎

爰就諸營適中爽塏之區爲帝君立廟章服儀衛森嚴具備凡

歲時朔望公必率將士而拜謁焉夫普天之下方隅之鄉無不
虔奉帝君廟食其土雖愚夫庸豎聞帝君之名則肅然起畏見
帝君之像則悚然改容皆由忠義之氣有以感之使然也今流
沙荒漠廟貌巋然爲從來所未有諸將士往來瞻禮仰帝君赫
奕千秋之靈益服 天子懷柔百神之德由是眾一乃心人百
其勇不啻冥冥中潛驅而默翼之至於西域遠夷重譯通貢過
而見之者其震懾惕息更可知也此固人心之所同然而又出
於不得不然者揆之聖人神道設教之意殆有合歟是役也經
始於康熙五十七年之某月落成於某月門殿樓廡墜茨丹堊
不踰時而畢舉斯卽軍心鼓舞窮寇殄滅之徵也 某董事戎行
目擊其盛承公之命謹爲文記之以示後云

跋

趙莠公騰囊卷第一

充

跋郭于宮隨侍集

秋云暮矣朔寒棲遲月彩流天霜華滿地風鳴紙罅蛩叫籬根
茫茫百端誰與消遣適于宮郭子手塞外近著一編相示諷詠
數過悠然殆移我情觀其託物寄興因事感懷以兀稟卓犖之
才而自得乎清曠夷猶之致非所謂灑氣發清響剛健含婀娜
者耶余尤愛其路生雲白處人淡葉紅時到館見紅燭懷人當
素秋等句不減辭司隸人歸雁後思發花前也謝君佳句爲我
排愁因書數語以識之

跋肯齋額後

貞巖林老先生爲晉江望族曩與余同官京師稔知封君禹城
公以純孝著稱保世克家詒謀甚裕貞巖紹庭惟謹以故治事
郎曹出守廬陵歷有政績嗣以讀禮言歸於霞陽中葺一精舍

自顏曰肯齋蓋取若考作室厥子堂構之意也余奉命從軍
酒泉貞巖亦至復共事戎行晨夕相遇敘及構齋之事且屬爲
書額余美其一居處不敢忘親善繼善述已見乎此因樂書之
并綴數語於後以表其志之所存云

跋友人手鈔孝經後

昔孝經成而虹玉降甚矣孝之可以動天地通神明也夫子自
言行在孝經先儒云世間極繁難事自聖賢爲之則無難所最
難者一孝耳蓋孝無成轍亦無盡境日用行習之間實有他人
不及知而已獨知之者經文具在人人可體認而得也寫是經
者手鈔目覽口誦心維永言孝思念茲在茲可謂有心人哉

郵書彪弟入泮文尾

兩義並有結構筆鋒亦鈿利無前杼軸予懷真覺行文爲樂事

趙葵謦公腹囊卷第一

三

也吾叔父視學山左齋鹽不給扶病衡文盡瘁蚤世迄今忽忽
逾三年矣緬想音容愴然如昨諸弟藐孤頗知努力自振以續
書香余年來滯迹京師時復寓書戒勉以仲弟未獲一矜尤諄
諄致助焉比者扈從塞垣接吾大人手諭云汝彪弟已得入泮
可慰汝叔之靈弟亦鈔其試文示余捧讀色喜旣而念學使者
宮諭先生向與叔父爲同年性命交道義相敦一介不苟叔父
在山左時先生一無所請託客冬奉命莅吾鄉余亦絕不敢
干以私然吾弟卒未嘗不受知於先生也余旣服先生之公明
而又痛吾叔父與先生舊日之交誼如此乃先生今日賞拔其
遺孤而竟不及見矣因揮淚志其文尾郵以示之

贊

觀世音像贊

色相皆空何名爲觀聲聞俱寂何名爲音以大慈悲發大聰明大千世界悉見悉聞救眾生難現說法身楊枝甘露蒲團鬘璉千變萬化一菩提心不觀是觀無音是音是名爲觀世音

諸羅漢像贊

繡出枯禪活現真圖直豎拄杖做甚工夫鍼鋒對著一字也無試問拄杖是甚麼答不來固錯答得來也錯丟開拄杖頭頭是路

布袋和尚稀奇笑口終日嘻嘻天生偌大肚皮有甚不合時宜袋中空洞無物納著芥子須彌看恁干鍼百縷剎那現出菩提卻是袒肩露胸半身不掛一絲

猛獸易伏猿馬難降佛子無心無意跨背橫衝直撞甚麼是猿甚麼是馬空山霹靂一聲萬緣一齊放下

趙裴尊公贖葉卷第一

三

手拈拂子只弄獅子置下獅子有甚宗旨不如豎卻一指萬法歸根都是

小畜猙獰搖耳豎尾像個貓兒像個狗子纔著擬議一口咬死滿堂糟漢癡呆老僧一棒在此要去便去回頭只爭些子

昭昭乎龍之爲靈老僧視之如蠅蚋無欲者能制有欲忘形者能藏幻形倒出淨瓶甘露鱗爪拏攫風腥究竟真龍歸甚處雲在青天水在瓶

論

黃鍾萬事根本論

天下之事必先有本而後有末一事各有一本而萬事又共有一本索諸形象則滯求諸幽渺則虛惟深明理數者溯流窮源因端竟委要不外聲氣之元而得之知此而可以論京房所云

黃鍾萬事根本之說矣夫數始於一終於十而成于三易言天地生成之數自一至十而河圖則五與十並居中宮十無專位洛書則戴九履一其數卽止於九蓋九者以三乘三之數也黃鍾之長九寸殆本於河洛之相爲經緯者乎由是下生者三分損一上生者三分益一黃鍾生林鍾至仲呂復生黃鍾而十二律具焉凡高下清濁之節皆可於九寸之管次第推之此審樂之根本也仲冬之月律中黃鍾而歷家以十一月甲子朔旦冬至爲歷元故先儒云律元得而歷元可正此造歷之根本也且以九十分黃鍾之長一爲一分遞而十之爲寸爲尺爲丈爲引而長短可度矣黃鍾之管容子穀秬黍中者一千二百以爲龠遞而十之爲合爲升爲斗爲斛而多寡可量矣黃鍾之龠所容千二百黍重十二銖倍之爲兩十六兩爲斤三十斤爲鈞四鈞

趙葵公臚臺卷第一

三

爲石而輕重可權矣更廣而言之唐虞之九官禹貢之九州成周之九服九賦亦黃鍾之九數也然則黃鍾爲萬事根本誠數之自然卽理之一定者哉蓋黃鍾者聲之元也五聲以宮爲君黃鍾屬宮而臣民事物胥統於一聲黃鍾者又氣之元也二十四氣並開於子黃鍾屬子而生長收藏胥備於一氣譬如草木之有根本焉其始生也甚微漸而句萌甲坼漸而華實暢茂生生不窮莫可限量也是故黃鍾於五行則爲土土能生物在六十四卦則爲復一陽始生之卦也明乎天地生生之道其於黃鍾根本之說自心悟而神解矣

先天後天論

易卦有先後天之不同何也曰不同者其位而同者其理與數也先天之爲乾兌離震巽坎艮坤以對待之體言之也後天之

爲乾坎艮震巽離坤兌以流行之用言之也此其位之不同者也若夫先天乾位乎南而巽與兌離三陰卦居其左右坤位乎北而震與坎艮三陽卦列其東西以明陰陽有交錯之義後天則自東南以至西巽離兌之三女從乎坤自西北以至東坎艮震之三男從乎乾以明陰陽有一定之分然乾坤兼統乎六子男以代父而匪母則不育女以代母而匪父則不生是定分者未始不交錯也先天由震之一陽歷離兌之二陽以至於乾由巽之一陰歷坎艮之二陰以至於坤見陰陽皆始微而終盛有並行不悖之功後天則由震至坤爲春夏之生長以震之一陽始由兌至艮爲秋冬之斂藏以艮之一陽終見萬物所成終而成始有一氣貫通之妙然陰陽消長於剝復復爲陽生卽始於震之一陽剝爲陰盛仍終於艮之一陽是並行者未始非一氣也此其理之同者也至於先後天相易之數亦有可言者乾坤之易爲離坎則乾坤互交而並易其中也離坎之易爲震兌亦離坎互交而各易其上下也四正之卦皆變其一畫耳先天之巽易以震之上二畫而爲後天之坤先天之艮易以兌之下二畫而爲後天之乾先天之兌反之卽爲後天之巽亦取於艮之上下兩畫也先天之震反之卽爲後天之艮亦取於巽之上下兩畫也四維之卦各易其兩畫存其一而不變焉孰非就先天之對待者而交易之乎此又其數之可推而知者也蓋伏羲之八卦以陰陽相配而成位乃化工自然之象是謂先天而天弗違文王之八卦以奇偶錯綜而就列乃歲功迭運之序是謂後天而奉天時先聖後聖其揆一而已矣說者又謂艮旣易兌之二畫而爲乾則兌何不易艮之二畫而爲坤乎巽旣易震之二

畫而爲坤則震何不易巽之二畫而爲乾乎夫後天之必以乾居西北坤位西南其理與數自有確然而不可移者邵子得其圖而未洩其義朱子於說卦亦未之詳苟非大聖人者心涵河洛之祕道契義文之傳豈能闡其精微而發其神妙也哉

趙裘萼公臆藁卷第一

趙裘萼公臆藁卷第一

一

川

浙江書局刊

張大昌校

姚煥校

張景雲校

行述

先考戶部尚書諡恭毅松伍府君暨先妣龔夫人行述

嗚呼天乎天之待府君者素厚何至今日而忍施慘酷乎縱不孝熊詔螻蟻微軀不足以代父之命獨不可以一家子姓合減數十年之算爲府君少假數年俾不孝侍一日湯藥跪受彌留一言捧手足視舍穢以安府君之魄猶得比於子數耶今何使我至於此極也府君年垂八十以身報國以勞盡忠以死勤事病起未久日進官署治文書歸而委頓倦卧兩晝夜奄忽以終時惟不孝鯉詔暨兩孫在側不孝熊詔方奉命從軍酒泉見府君再疏乞罷略陳病狀心膽墮地然亦夢不到此事莫大於送死痛莫甚於傷心名教之罪人直無所容於天地之間惟

趙裘公贖藁卷第二

一

881

有一慟而絕速從府君九泉祈兩載別離之慘敘萬里馳驅之苦夜臺絮語繞膝相依差可塞恨耳更何以生爲哉迺荷聖

明軫恤特召奔喪感激君恩勉延殘喘因念府君一生自

少至耄立心制行竭力致身諸大節海內無貴賤賢愚皆能道

之而不託於當代之文章以附史乘而垂無窮則不孝死有餘

責用是草土衰絰中與不孝鯉詔日相嚮號哭哭已輒各憶見

聞濡血和墨粗述梗槩以備名卿鉅儒采擇焉府君諱申喬字

慎旃松伍其號也趙氏支裔本宋魏王德昭傳十四世孫爲叔

珍公子貧依外家始遷常郡西鄉之觀莊以農業自振叔珍三

傳至南沙公思賢世寢以昌南沙生西溪公鑑西溪生復溪公

綱復溪生見瀾公珊見瀾生元台公名臣以府君遇覃恩贈

資政大夫都察院左都御史配高氏贈夫人是爲府君祖考妣

也生丈夫子四先王父贈資政大夫都察院左都御史止安公繼鼎行第三自始遷祖叔珍公而下至先王父始以儒術顯中前明崇禎丙子舉人庚辰進士授湖廣公安令三院合薦歸杜爲楚省第一因入覲遷兵部車駕司主政卽奔元台公喪歸杜門不出元配前王母贈夫人白氏卒於公安官署生四子皆歿殤繼配王母贈夫人白氏卽前王母嗣妹也生府君之日嚮晨紅光滿室俄而分婉眾咸異焉甫五齡族難蠶起先王父變姓名渡江而北以推命賣卜爲業族讐因壞我邱壟燬我廬舍府君日夜號泣不止幸直指趨正張公愼學廉其狀諭邑令敦請回籍府君聞先王父歸未及里門卽踴躍令人抱持登舟執手號哭蓋其天性純孝自幼已然也先王父罹難後歲歲授徒以餬八口毅然以師道爲己任自稱江南老教書府君隨侍館中

趙妻公廣墓卷第一

二

八文上

父子如師徒十一歲作嘗獨立兩節題文結云於此見夫子爲人父之甚慈凡天下之爲父者視諸此於此見伯魚爲人子之甚孝凡天下之爲子者視諸此先王父批文尾云說到慈孝是大道理亦見心術之正固蚤期爲大受矣歲辛丑江陵念蒿胡先生在恪視學江左府君應童子試以五經七藝拔冠一郡壬寅食餼娶吾母龔夫人合昏未彌月卽隨先王父宿館中晝夜勤讀嘗下帷郊外僧寺寺多孤客遺棺年久朽壞每至夜分青燐滿室府君心惻爲擇寺後隙地瘞埋堆塚若干併立標識以待伊親領回己酉讀書祖居之觀莊先王父手授先正程墨藏本丹黃評隲曰此正宗法派也府君奉爲典型研精覃思簡練揣摩臨場構藝幾於句無泛設字無虛下一洗時俗庸濫之習及錄遺兩試無名最後始得見收距場期僅一日耳旣入試二

塲甫脫稿忽有墨痕污卷頁以管刮之而蹟愈露是科貼例甚嚴府君自分不免因念先王父春秋高奈何不自慎預致擯落以重傷親意遂於燭下割題紙爲誓文數百言焚禱於神終卷而出榜發捷音至府君追憶前事大哭不止不孝時方七歲目覩情景至今宛然如昨卷出閩中朱舍英先生維高之門而座主則交河蘇次公先生銓東莞祁如松先生文友也庚戌捷南宮總裁爲柏鄉相國魏先生合肥芝麓龔先生海豐冰壺王先生高平沛蒼田先生本房爲揭陽楊大山先生鍾岳諸先生初閱府君卷皆以爲必老年名宿洎相見知尙未及壯輒驚喜嘉歎先王父喜步武有人半生沈結幽憂之思亦稍釋而家貧不能具菽水硯田外無可以爲生者府君爲諸生時嘗館於皖江釋褐後主人固邀仍復就館歲得脩脯封識不啟盡遺王父母

趙裘夢公騰臺卷第二

三

66

爲甕煖助癸丑有事濠梁過關山忽心動謁關廟占籤復不吉乃亟歸而先王父已疾作延醫日進參藥卒不瘳遵遺命三七而葬拮据棺衾經營窶窶艱苦萬狀越一載而吾母龔夫人又復捐閣府君義重糟糠誓不再娶兩遭喪變意興蕭索嗁聲在廬淚痕在枕三年不少輟辛酉筮仕商邱時白太夫人在養奉板輿以迎先意承歡婉容愉色邑最煩劇隻手治官書不資幕客嘗徹曙不寐晨出視事端坐堂皇者竟日斷決如流有投牒者一經訊問數年後見之猶能指其姓名人咸以張睢陽爲比邑素多盜因嚴行保甲法如有匪類令鄉者各行指報訊得實則重懲不貸盜遂斂跡邑中糧地徵收恆患版籍不清有虛糧而無田者有實田而無糧者迺於推收時每戶給照單一紙令填寫田畝四址及完糧里甲隱匿者許其自首而虛糧盡與豁

除編號鈐印付民執業後有買賣單隨契轉糧地由此一清康熙二十二年歲饑各縣煮振多鶩虛名府君獨親臨檢視遠者給米糧近者施糜粥鄰民趨赴日增倍蓰云吾邑散振若得如此盡沾實惠寧忍遠離鄉井耶府君爲之憮然捐俸募資購米接濟猶苦不贍署有數縑都變賣充用所全活者甚眾窮鄉嫠婦青年矢節白首完貞舉報無人多致湮沒府君諄諭諸生采訪一生流涕不止自言其母早寡苦節家貧無力表揚今聞鈞諭不禁傷感府君卽令諸生核報在任數年凡節婦合例者概請題旌樹坊府君有事出過綽楔下輒展拜以示風勵至以人命控者卽單騎相驗若係自盡立時斷結以免拖累某村離城數十里有民家子被誰何所殺薄暮來控鐘定後策馬出城至村方四鼓憩古廟中俟天明相驗適見隣屋僻處有一血褲

趙妻夢公贖蓋卷第一

四

拘訊卽得真凶人咸以爲神先數日廟祝夢神云某夜有文曲星到此吾當退避是夕府君至適符其夢鄉民有患瘧者用紅箋書本縣趙公在此瘧遂已至今猶驗丙寅夏行取入都以部員用戊辰春授刑部主事未數月聞白太夫人訃徒跣南奔盡哀盡禮終制尙茹素不輟也壬申冬再補西曹以廉辦著稱楚中有命案讞辭多文致例應駁減滿大司寇不可府君侃侃據律力爭卒得減等甲戌春陞副郎未一月卽以忤忤疾乞假滿大司寇深致惜焉里居七載讀書課孫不輕謁當事邑中官吏有因公舞弊病民者則指陳利弊娓娓數千言不少假當事屏息欽服庚辰冬奉 特旨召見辛巳赴 闕超授浙江布政使

陛辭面奏

臣 受

恩非常自當竭誠報效倘有不法求

皇

上加等治罪并奏求

宸翰俾得朝夕瞻仰如對

天顏

上

云且看汝一年之後隨策竄出國門由家之任受事三日卽具詳兩院請革南糧口袋查浙省南糧月給旗營官兵關領每石兵則歲索一口袋旗員則每次索一口袋卽不及一石者亦如之派取民間每袋折收錢四十文省倉歲收米九萬六千七百石卽派收口袋十萬有奇約費銀四千兩民力幾何堪此賸削請照京倉例令官兵各自備口袋關領兩院隨移將軍罷之自是南糧口袋之派累始除又州縣解餉兌收時筭庫請示兌法府君厲聲曰銀百卽兌百何問爲自是藩庫之加平始革又檄告通屬謂欲清州縣虧空先革藩司陋規若錢糧加平若餽送禮節若兵餉掛發若奏銷部費若委署夤緣若南糧徵收所有陋規盡革除之以免民間派累又詳請給發外營兵餉銀米舊例解府轉發今令悉歸本州縣支給不必再解以滋需擾又詳

趙壽公臆書卷第一

五

八文上

請均山陰縣坊鄉田畝一例當差以絕徭役偏枯又司庫有府解戶役欸項爲解部本色物料貼費歲支不及什之四五存者卽歸藩橐名曰羨餘府君則毫毛無所動將授代命主者核籍竟存二千餘金令封識貯庫留交新司曰吾上年奏銷未用一錢繼我者勢必不能得此足辦今歲事矣毋再擾民爲也吾家距杭甚近府君每於家人往來輒令攜米十數斛抵署備用或謂府君曰公清風峻節固迥出羣表然位致方伯而囊餼仍取給故鄉毋乃有平津布被之嫌乎府君曰君言良是但吾之爲此者實以寥寥數口挈之偕來薄田所出正供而外無所用與其貲吾家曷若供吾署取諸田省諸市譬如販粟來杭獲價而歸不亦可乎且吾不欲以口食累吾民也言者歎服大堂揭一聯云 君不可負只是心難負負心者不容於堯舜天不可欺

諸謂人易欺欺人者如見其肺肝嘗誠曹掾曰吾無幕客一切
案牘皆吾手理汝曹若相欺能保事事不敗乎掾頓首言掾雖
賤亦有天良如公者掾固不敢欺實亦不忍欺言已泣下府君
爲之動容壬午春遷本省巡撫襟被一肩書卷數篋依然浙浙
時也 上賜御書崔子玉座右銘恭摹勒石建亭供奉時瞻誦

以自警是秋錢塘江湖迅猛隄岸坍塌日甚府君迺齋戒三日
虔設牲醴自撰祝文率僚吏將士赴江干祭告時潮甫至風狂
浪激溢湧如射觀者踉蹌奔避府君獨朝服屹立不動潮乃距
祭所丈餘忽止若有所限者官民環覩駭異府君因與江神約
願假數旬以畢興築嗣後潮汐遂不逼塘先是府君任藩司時
見城臨大江潮汎洶湧直逼塘根石者傾缺土者衝嚙勢甚險
迫力言於撫軍繪圖題請興築部議准借歲修銀應用府君復

趙表書公慶囊卷第一

六

八三

罄檢司庫閒欸悉構工料將盡易土以石并築子塘以護其基
而水發江漲畚鍤莫展至是得以及時施工越七旬塘成而潮
始至江神爲宋進士陳賢浙之嶺人也府君後任偏撫時題請
封祀焉歲當大比疏請增廣解額格於部議 特旨允行監臨
文闈內外肅然無敢以身試法者及主試武闈亦然十月奉

命會審湖南鎮筵紅苗一案事竣遂調撫偏沅癸未春 皇上

閱視河工府君疏請 陛見因馳赴 行在白淮至蘇屢覲

天顏蒙 賜御書督撫箴暨綏輯撫安扁額又以湖南積習相

仍私徵無藝 特頒坐名 諭旨力減加耗盡革私徵如有藐

法害民者聽爾糾參治罪并 面諭云汝勉力做去府君至長

沙通飭各屬恭奉 上諭建亭勒石萬姓歡呼官吏屏息湖南

積習橫行私派重收火耗正供外巧設鞭撻硬馳公費腳價諸

名目有每糧一石加派四五錢至二三兩不等者有借稱公務逐事私派一年之內難以計數者至花戶完納條編重戡秤收又每兩加耗二三錢不等府君遵旨嚴行禁飭寬其既往許以自新又念州縣私派重耗之由一迫於上司之需索一惑於姦棍之逢迎遂爾罔顧名節甘蹈法網乃矢心刻勵以身表率咨明兵部止留標下隨丁糧二十名歲得餉銀二百兩米七十二石爲日給之需其官商一切規例餽遺毫不收受因酌減司道府州之交際以清吏治嚴革地總歇保之包攬以塞貪源屬員中有操守清廉辦事勤慎者則薦揚不遺餘力如衡永郴道張公仕可藍山令楊公宗仁桂陽牧伍公士琪皆膺卓選衡永郴道王公朝恩以僉事題授臬司薦贖已上不使之知也若貪污敗檢如安化令之多收火耗岳州衛之私用重法署湘潭令

趙襄公警臺第一

七

八

之見事焚臧黔陽令之違禁雜派則立登白簡不少姑容八年於楚上行下效大法小廉積習盡除民歌樂利至驛鹽糧道衙門叢弊尤加釐剔有驛州縣本地實徵銀兩不令坐支必俟解道赴領從中勒扣又買補倒馬銀兩不卽給發必俟再三守候多方需索府君因嚴飭該道將各驛所需夫料銀兩先儘本地坐支外有不敷亦徑赴各州縣支驛站協濟止令按季詳報其倒馬銀兩隨倒隨支買補不必解領於是各驛之苦累始除漕糧向例州縣僉派里民包收包解又藉稱折銀赴岳買米多勒重價而糧道兌漕則有篩颺樣米修倉填單插籌畫會裝艙鋪艙開鑼穩跳船規腳價花紅酒禮諸名色恣意魚肉府君條示禁革并當堂較發制斛令州縣官收官解於是里民之派累始除湖南例食淮鹽運腳既重而自院道以及州縣鹽規又恣行

需索以致商無忌憚高擡價值府君過武昌卽傳集各商面諭各衙門陋規盡行革除并檄行司道酌定衡永寶三府鹽價總照長沙時價低昂外加腳價鹽租務照准揚解包餉數不得任意抽減於是商知畏法民不淡食南秋米石例於七月開徵而撥供制營月米則又應按月關支故春夏二季兵米州縣每多預徵以應青黃不接民苦輸將府君查湖南長衡岳寶靖五府州應徵南秋二米一十三萬有零而湖南二十二標鎮協營止需月米七萬有奇餘米六萬則解貯道庫以俟變價充餉若將貯庫充餉米石撥給春夏二季兵糧其秋冬二季就於七月新徵內支給每年除現給本年秋冬二季外卽留充下年春夏二季兵米可免預徵疏三上得 旨俞允於是兵有鼓腹之樂民無剝肉之虞科臣條奏漕糧抵通多有掛欠嗣後耗贈漕截銀

趙善壽公贖糶卷第二

八

八

米暫存道庫俟回空時倉場查明掛欠行知扣抵如交納無欠方許照數支給已經部議題準府君念湖南運道遠於江浙而漕截漕贈惟江浙爲獨有若湖南則僅藉二耗以資飛輓今併扣存徒以五十兩四錢之行月厯江湖涉淮黃越數千里以達京師窮丁卽有急公之心重運終鮮神輸之術束手坐視必致誤漕迫令開幫豈能枵腹因將二耗照舊給發責令旗丁尅日開幫具疏上聞奉 旨這耗贈米石若不預行支給旗丁必至困苦卽無掛欠回省或有不肖官員不給旗丁侵蝕入己亦未可定趙申喬將耗贈米石預給旗丁甚是爾部照戴璠條陳議奏不合這事仍照舊例行欽此湖南學校冒濫成風文武諸生每多鬼接頭飛過海及附案諸名色而學政考校又多優劣不分徇情濫取并任聽經承沈攔紅案招搖舞弊添換姓名倒提

等第府君不避嫌怨糾參釐革庠序肅清至教職例在本省銓選湖廣南北省延表數千里中隔洞庭若以南而選北以北而選南途路既遙風波復險或苦於盤費而力難赴任或渡湖阻滯而憑限多違府君因爲題請將嗣後歲貢候補教職畫分南北選授奉 旨俞允著爲定例而寒儒老生得免險阻跋涉矣

府君素重名節每於政治之暇留心采訪遇有前代理學忠義諸先正墳墓祠宇傾頽者必竭力設法修葺如屈賈祠宋眞西山祠李忠節公芾祠鄒忠公道鄉祠趙忠定公汝愚祠明蔡忠烈公道憲周公二南二忠祠劉忠毅公熙祚祠陳忠潔公純德祠多爲居民侵踞春秋失祭府君令有司勘實清釐舊址復祠崇祀而於蔡公更爲理其田表其墓以志嚮往焉至各屬舉報節婦飭令州縣通報文到立批司詳覆隨到隨題復爲題請建

趙夢公騰藁卷第一

九

文川

坊銀兩照舊於師生空缺俸廩內支給奉 旨俞允至今遵行不替康熙四十二年府君奉 命勦撫鎮筸紅苗會同 欽差督提懸軍深入親歷苗寨宣布 朝廷威德且撫且勦一夕行營從者纔二十餘人在巉巖密箐中忽聞礮聲沸起則頑苗弄兵鳴鏑已達制府帳前各營惶駭俱策馬疾馳府君獨屹然不動攬轡徐行勒兵彈壓苗乃懾服振旅而還丁酉冬蒙 皇上面加嘉獎具見 聖聰之無微弗徹也至被宋閣學誣參又被俞提督訐奏幾罹不測俱荷格外 殊恩曲賜保全府君每一言及輒感泣不能自己戊子春 上閱視溜淮套工程 巡幸

江南府君馳赴清江浦迎 駕 皇上下詢湖南吏治民情府君一一奏對 天顏溫霽恩賜有加 頒賞哈密瓜葡萄榛松瓜條乳餅羊二隻併 賜綠松寶硯一方玻璃眼鏡一匣令回

原任辛卯正月蒙 恩陞補都察院左都御史屬吏見府君清風兩袖幾不克備行李彙送贐儀以供芻秣府君堅卻之仍策蹇入都門蕭然襍被雖單寒儒素不是過也啟行之日士民攀留不遂皆執香號慟自長至岳數百里叩送不絕州縣多建祠設位以祝長生又搜輯在任奏章咨移批詳牌示其六卷刻之名曰趙公實政錄以志不忘云府君任總憲職司風紀砥節奉公不敢營私而植黨不務搏擊以沽名惟仰體 皇上如傷念切廣求民瘼苟有便民之處輒見章奏以廣 皇仁屢蒙 俞允檢有 聖世施恩已極一疏查康熙五十年奉天應徵米豆部議蠲免至臺灣應蠲穀石奉 旨已經徵完在官雖蠲免與小民無益將五十一年穀石著行蠲免等因欽遵在案請將潼關衛與大同府五十一年未免米豆草束懇賜與奉天一例恩

趙襄公贐卷第一

十

80. 文 6

蠲倘或已徵在官亦懇照臺灣例準於下年蠲免部覆無庸議奉 旨潼關衛大同府所屬五十一年應徵米豆草束既已徵完今雖蠲免亦無益於小民明年應徵米豆草束着蠲免欽此又有恭逢 萬壽昌期謹推三年蠲免錢糧之例請免官地房租以廣 皇仁事一疏得蒙 俞可列入康熙五十二年三月十八日 恩詔欵內辛卯秋典試京闈壬辰充會試總裁皆熬香設誓藉神明以佐國法評騭每逾午夜繙繹或達晨曦經藝與書藝兼衡後場與前場並重諸經房遺卷有佳者搜羅無失殫精疲神以至手皸目眇不自恤也三月十一日府君尙在禮闈 特賜硯一方是年冬九卿面奏江南督撫互參一案 上

諭及天下清官因云趙申喬任偏沅巡撫時居官甚清但有性氣人皆畏其口直與俞益謨互相訐參彼時亦有以趙申喬爲

非者朕細加察訪卽彼所轄武官及陝西人良心不昧俱言俞益謨之非無有以趙申喬爲不是者清官固所當惜而其言之不可行者朕亦不行如趙申喬條奏黃河坍塌地免糧一事朕亦不準行雖所言未當而並無私見凡交與伊一應事情皆實心辦理朕亦以此護惜之欽此府君隨叩謝 天恩感激之私非可言喻 皇上六旬萬壽 賜貂帽一頂團龍緞袍掛一襲松

花石硯一方 覃恩封贈三代蔭一子入監讀書四月 上以

粵東米價騰貴恐民乏食停徵本年錢糧 特差府君偕傅少

宰前往會同督撫減價平糶倉穀并遵 恩詔賞資兵丁府君

到粵卽宣布 皇上德意協同督撫商權平糶謂價若昂則病

民價太減則阻商每石以一兩八錢爲率於是商賈雲集市價

遞減民賴以活隨徧歷營汛按籍給賞訓練士卒整飭行伍浮

趙雲臺贖墓第一

七

文

者汰之缺者補之老弱不堪者易之將弁懾服軍政肅清粵地

濱海時值溽暑蚊蚋甚多僕從卧不安席府君獨寢一室不施

帷帳寂無蚊聲至今宦粵者詫爲異事是歲府君年登七十奉

差在粵不孝熊詔又扈 蹕塞外不克隨侍膝下捧觴上壽因

於侍直閒從容求賞匾額蒙 皇上御書匪懈堂三大字以賜

不孝隨遣子侗敷馳捧代祝府君拜受喜動顏色連進數觥不

孝聞之方謂 天書寵錫庶保永年豈意未屆耄期竟棄捐不

孝而去也嗚呼痛哉甲午二月府君回京奏覆稱 旨時已遷

戶部尙書部務冗沓卯出酉歸寒冬暑短則攜稿回寓燃燈批

閱恆至四鼓不輟有支領錢糧者必詳慎旬稽雖叢怨招尤勿

恤也又河閒府滄洲旗退民地七百八頃有奇久奉 旨永停

圈撥百姓行差納糧載在全書忽有莊頭李必達等具呈內務

府行文欲在內撥給六百一十頃零撫臣以此地滄民承種輸租已久若一撥取則千百窮黎俱無依賴勢必失所請將李必達等在各屬旗退地內均勻撥給部議不準府君獨議應如所請以免窮黎失業以廣 聖主洪慈奉 旨依議又買賣人馬維屏等呈請繳銀萬兩交部領換大錢在於京城內外收買小錢陸續交局改鑄奉 旨著交包衣昂邦內務府已准其所請將稿送部會題府君以小錢驟難禁止故前議寬限使大小撓行正於商民兩便若准其所請收買則錢價必致騰貴且恐奉行不善或致多事擾累地方應無庸議奉 旨這事議得狠是欽此壬辰乙未 殿試府君兩充讀卷官蒙 賜聖製七言律詩大金扇一柄又 御書水能澹性爲良友竹本虛心自得師對聯一副眞異數也丁酉三月因奏鉛筋壞爛部議革職奉

趙夢公贍養卷第二

三

又

旨著革職在任効力四月又因劉芳昇一案與九卿兩議自行檢舉部議革任奉 旨從寬仍留任成成會闡開列主試府君

自以齒力衰邁腕疼目眩移部注假及屆期宣 旨仍奉 命

偕冢宰張公爲大總裁府君感 聖恩高厚衡文重任屢膺

特簡因力疾評閱不敢言勞雖精神日以消耗形容日以憔悴

府君竟不自知也是冬不孝熊詔奉 命從役西陲啟行有日

府君見不孝依依膝下神色慘阻毅然曰馳驅 王事分也戮

力供職毋以我老爲念不孝跪而受教因與鯉詔揮涕曰我生

不辰獨以老父相累矣辭訣而行自是京邸日以遠魂夢日以

離跨馬從戎輸餉巴里坤者再關山萬里睽隔兩年晨昏不克

定省盤匱不克捧持疾痛疴癢不克承窻出入憂喜不克瞻顧

撫心飲泣仰天禱祝惟冀穢厥小醜旦晚凱旋猶得展拜高堂

以補供子職豈期親不我俟一日之生離竟爲百年之永訣耶
嗚呼痛哉庚子二月府君寒熱數日忽患洞泄不止十五日猶
至西苑坐班歸寓連瀉數次足冷至膝十八日叩祝 萬壽不
能自起賴同官扶掖成禮因具疏乞休奉 旨卿効力年久清
勤自勵簡任司農正資料理著照舊供職不必以老病求罷該
部知道府君感極涕零伏牀叩頭恭謝越數日腹瀉不休足難
履地復具微臣衰病難瘳事一疏仍蒙 溫旨慰留又奉 上
諭前覽戶部尙書趙申喬辭本朕深憐之念其操守到老清廉
性雖暴躁爲人朴直年近八旬病勢難料全愈倘一時難保亦
未可定趙申喬乃革職留任之官著照陳詵之例復還原職當
賠之銀一概寬免內閣將此口傳旨意着速發去令病人早知
一天或五內少得安寧服藥調攝即可頤養也府君跪誦 天

趙襄公賸葉卷第二

三

言淚隨聲下隨具摺遣鯉詔齋往熱河謝 恩蒙 皇上連賜

膏藥及藥丸隨貼臍併尾間腹泄頓止七月足痛漸愈隨於二
十四日親赴熱河叩謝 皇恩獲覲 天顏不勝欣幸八月初

自熱河歸卽進部辦事斯時身體尙未復舊祇以受 恩深重

圖報念切不敢再以衰老求退又不敢在寓偃息朝夕勞勩不
異從前十月望日隨諸大臣忭舞叩賀又蒙 溫諭垂問歸語

兒孫闔門感泣十六日更定後回寓心神恍惚語言蹇澀天明
稍覺清爽仍赴部如常十九日又隨九卿赴西苑二十日尙力

疾到部滿尙書孫公慰勸始歸二十一日力乏不能起牀口中
誦言部事喃喃不絕二十二日喘急愈甚易簣時兩目瞪視自

歎 主恩未報齋恨重泉口授遺疏令鯉詔繕進時不孝婦陸

氏侍疾牀前念不孝遠涉西陲未卜稅駕因涕泣逡巡冀或一

語家事府君張目顧之終無一言迫鯉詔捧參藥以進而氣息益微不復續矣嗚呼痛哉此情此景不孝總未見也卽碎身萬段決脰刳心摧筋剔骨豈能蔽厥辜而銷長恨哉二十五日晚上見遺本卽傳奏事大人問趙申喬是幾時沒有如何沒有皆回奏云不知奉 旨趙申喬効力年久清勤自勵簡任司農實心辦事忽聞溘逝朕心深爲軫惻應得卹典著察例具奏二十七日 特命宗室公南書房張少司寇漢侍衛六人臨奠茶酒行三叩禮不循常格禮臣具典禮以聞蒙 賜卹如制閣臣擬諭上請 特予恭毅二字不孝等子子孫孫卽捐糜頂踵未足仰酬萬一也語云知子莫若父知臣莫若君先王父之臨沒也呼府君曰爾知字汝意乎諸葛武侯王佐才而其自信不過曰謹慎而已今府君不惟恪守慎之一言且併武侯之鞠躬

趙妻善公賡墓卷第一

西

盡瘁死而後己者視之亦爲無忝府君與人交終身無情容倨色爲撫藩接見屬吏必以禮入居九列動容辭氣滋益恭庶幾古君子行己之道嘗言大丈夫事業一生豈做得盡惟有做一日僧撞一口鐘捐館前二日猶晨起入部執筆判牘不肯休若不知身之有病者曾子論士之弘毅終之以死而後己朱子所謂一息尙存此志不容少懈也今府君刻苦數十年品行經濟盡在 賜諡兩言之中非 皇上深知篤信於老臣何以得此古來臣子之受知於君父孰有過於府君者哉居常訓不孝輩曰今人多好以清官自負夫清非僅不名一錢也須兼廉明兩義始得廉則一塵不染如冰雪之清明則一毫不蔽如水鏡之清若徒一介不取而處事糊塗世安用此清官爲吾外懸藩撫十載何曾做得清官來如初任浙藩時兌解協餉每平贏出錢

許詢之庫胥則云前任收兌稍重些需故耳合計可四百餘金
吾藉以餬口兩載此可謂之清乎撫浙不及一年變賣本衙門
朽壞號船一隻并繳進水手工食銀共七十兩有奇爲差往鎮
筭路費此可謂之清乎泊移撫偏沉隨丁二十名咨部食守兵
糧歲得餉銀二百餘兩米七十二石閩署待哺於此此可謂之
清乎所自信者吾於地方利弊民生疾苦蚤作夜思知無不爲
爲無不力差免糊塗之責耳至於戶部衙門苟有所得絲毫尤
爲不義非飭法欺 君此錢安得入手故吾在部未嘗敢私一
錢凡吾所爲有不可以告 皇上者卽不可以告家人爾曹雖
不言吾能不內愧於心乎府君不餽名不矯節循理而行審義
而處生平無一事不可對人言者大率如此不孝兄弟才並驚
下命復乖舛不能爲府君分憂反多以事貽老親憂丁酉二月

趙妻夢公騰卷第一

五

不孝被同官誣訐記注一事吏議必欲寘之死請移讞西曹

上洞悉無辜折本者再又傳問九卿亦僉議如前本旣上而

旨未下時不孝待罪西苑寓中薄暮府君馳一介至且攜一閩

柑賜不孝啖曰一有消息速報我旋聞 上折本不孝感極痛

深失聲而慟卽作手稟遣家人馳還抵邸舍已嚮晨府君猶一

燈熒然兀坐以待蓋竟夜不寢矣翼日府君以奏事至西苑語

不孝曰疇昔之夜神思荒亂殆不可言狀所以攜一柑啖汝者

恐一從吏議汝便當入請室吾豈能卽與汝相見故以此略示

分甘耳尋荷 聖恩矜宥不孝僅從削職仍供奉 內廷吾父

率不孝涕泣謝 恩兩月之憂懼始釋仲弟鳳詔初授山右沁

水令府君適任西曹臨歧誠囑有詩云保民若子方成子治邑

如家莫爲家所以鳳詔外任廿餘年從未敢以俸資攜寄故鄉

買田一畝置屋一椽此媿黨皆知之戊戌春鳳詔權於法府君
方典訖南宮出闈後始知之曰此子負 君恩死國法吾何悲
焉但吾老矣不意暮年見子刑戮也自此慘戚之容時見於色
是秋部檄原籍查家產邑令意有希合以寒家薄產無幾難於
開報遂及三黨羅織橫行二三親戚凡有餽粥田數頃者輒繫
之獄盡籍其田以充數至於寒舍所有一盃一箸一紙一縷悉
登冊以輸之官賴觀察李公太守劉公秉公持正令亦悍然不
顧猶以爲未足力請於上官疏參鯉詔禱職嚴追將得而甘心
焉府君憂之甚憐之甚一如不孝待罪時乃蒙 皇仁浩蕩概
免查追不惟鯉詔幸獲生全諸親友皆反故物得免餓殍府君
聞 命淚如雨下曰 上實使老臣再生恐老臣不能報矣世
世子孫敢忘此日耶不孝次男佺徵府君最鍾愛襁褓中卽提

趙妻夢公贖業卷第二

七

女川

抱左右稍長自課之識字讀書九歲後府君宦浙宦楚俱挈隨
行命庶母張撫之兒亦善承意指頗能服勞辛卯春府君入都
雖官御史大夫而僮僕寥寥門無賓客不孝復偁直 禁中扈
從塞外定省多闕鯉詔以邱墓祭掃數往來南北間蕭寓晨昏
惟祖孫兩人聚首未嘗頃刻離也戊戌五月佺徵以暴病死府
君哭之慟連呼曰天喪子旣而曰吾非敢妄比孔顏也以吾兩
人相依爲命直同此痛耳厥後府君貌益憔悴意緒更復無聊
每退食歸寓形影淒其輒呼孫乳名哭之逾歲猶然洞徹生男
元次七歲端慧如成人丙申以痘殤府君悲不自勝曰此吾冢
曾孫也曾孫與曾祖中隔兩葉且未識面然天性之痛欲遏轉
深良由我有餘殃累及童穉因手書淚語十數行命家人南歸
持羹飯詣塚哭焚之孰意今日不孝不得侍吾父而佺徵反得

長奉色笑如舊元次亦從地下初見曾祖跪拜起居也嗚呼痛哉府君少丁族難中膺劇邑未齒敷歷中外隻手措擘勤苦勝於諸生時屈指七年來大抵憂患之日居多燕閒則愁眉默坐出接賓客閒亦酬荅歡笑從未露齒縱聲比年骨肉彫殘生離死別感舊傷今老而彌甚加以年運軼軻動輒得咎操心慮患晝夜靡寧以故氣血日益耗精力日益枯一蹶而幸復支再蹶而遽不起也嗚呼痛忍言哉府君篤於友愛止安公自生府君後閱二十年復舉一子卽翰林院編修提督山東學政蔚什公也止安公捐棄時蔚什公甫十一歲府君親自督課長爲完娶以祖屋讓與獨居而田產則公析外復於不孝輩分著時仍照分授田百畝丁丑蔚什公成進士府君郵寄一聯云痛思往事無忘吾父之艱難恣念永圖甯效乃兄之迂拙蔚什公捧之涕

趙襄公賡葉卷第二

七

泣受教迨仕遷江府君爲拮据資斧令抵任癸未春府君隨

駕行在 天語詢及子弟履歷一一奏對後復從容奏云臣弟

申季遠任瘴鄉臣年已老恐此生不復相見 上頷之未一載

蔚什公遂得引 見改授翰林院編修旋提學山左以校士積

勞卒於濟南官署訃至府君痛悼殊甚每道及輒涕泣不自勝

府君尤篤於淵源之誼閩中朱公己酉房師也後爲瑞金令被

誣受劾府君親詣江右力白於大吏寃始得雪座師東莞祁公

後嗣式微書香中絕府君勉自節縮爲之援例禮闈房師揭陽

楊公謝世後諸孤孱弱府君竭力維持得免外侮初應童子試

受知于學使江陵胡公及撫楚南胡公適以壽終府君爲文哭

之周恤遺孤而勉襄其喪事府君愛惜人才樂於推輓任總憲

司農每遇九卿廷推人員一有所知卽急爲援引如陝西學道

今總憲朱公兩淮運使今兩淮鹽院張公皆府君保薦非有平生之素一見卽深器之又湖南舊屬藍山令尹秦臨湘令傅霽城步令趙璐府君遵 旨保舉得行取引 見又雲貴廣西會試限於定額府君將落卷進呈蒙 恩覆試雲南鄒啟孟貴州王夢旭廣西李祖望俱得 恩賜進士府君存心仁厚表裏坦白不設城府崖岸尤不喜訐人之短其有一言一行之幾於道則識之不忘方謂天佑吉人宜享上壽不意遽棄諸孤而逝也嗚呼痛哉府君淡於仕進里居時卽有終焉之志戊寅元旦年五十五歲自題神主曰白雲舊人并爲之說云白雲者何居白雲渡濱也舊人者何今古無常存之人歲月有易盡之景在今日則爲人在他年則爲舊也府君於去來之際固有洒然脫然不少繫戀者惟是捐棄不孝曾無片語留付此日夜椎心泣血

趙雲公賡墓卷第二

六

八文八

恨不得相從於地下也嗚呼痛其有極哉吾母龔夫人庠生雨若公女贈文林郎湖州府推官鹿蔭公孫女也于歸府君時吾家貧無力備鼓樂止用布幔肩輿外家又被盜燬廬亦不能具奩資吾母處之泊如也先王父治家嚴肅屋宇湫隘吾母歛容屏息終歲不聞笑語聲先王母白太夫人素慈愛吾母朝夕隨侍備得歡心與諸姑尤和好無閒丙午秋府君被放更深後吾母猶飲泣不止府君慰云吾未及壯未必無出頭日子汝不必重自苦吾母揮淚曰吾非慮爾無進步惟念阿翁春秋高試事兩番報罷無乃重辜老人望耶府君亦不勝悲慟越三載登第吾母喜動顏色幸老人之及見此也後府君歸里吾母相謂曰吾家固寒素不必學他人具冠帔亦不必買紉綺爲我製一青布衫足矣府君欣然諾之癸丑八月先王父疾大漸治棺孔亟

有親知告云日辰與冢婦相衝大不便宜易之吾母堅持不可
曰奈何以我故遲誤老人大事且修短自有定數無庸慮也迨
甲寅秋邁疾彌留時執先王母白太夫人手嗚咽不忍釋且云
婦職未終反以諸雛上累阿姑歿有餘恨而捐閣之期與先王
父屬纊之月日時一一相符數耶命耶天道果有知耶其無知
耶而吾母孝思肫篤不暇自顧可勝痛哉府君嘗語不孝兄弟
云吾與汝母伉儷十五年爲貧所困汝母仰事俯育旦夕拮据
辛苦備嘗未曾一日伸眉吾冀有以償之者而今已矣輒潸然
淚下嗚呼不孝追思及此終天之恨甯有極耶府君中康熙己
酉舉人庚戌進士歷任戶部尙書兼管錢法堂事務康熙五十
二年三月恭遇 萬壽覃恩誥授資政大夫生於順治元年六
月十八日卯時卒於康熙五十九年十月二十二日酉時享年

趙葵公臚墓卷第二

九

七十有七

特旨諭祭

賜全葬

賜諡恭毅吾母生於明崇

禎十五年二月初六日酉時卒於康熙十三年八月二十四日

卯時年三十有三歲康熙五十二年三月恭遇 萬壽覃恩誥

贈夫人庶母張氏先卒子四長卽不孝熊詔康熙己卯順天舉

人已丑 賜進士及第翰林院侍讀革職仍 內廷供奉娶陸

氏封安人次鳳詔康熙丁卯舉人戊辰進士原任山西太原府

知府娶唐氏次鶴詔早卒娶白氏苦節三十年待 旌次鯉詔

康熙戊子舉人候補內閣中書娶楊氏女二俱早殤孫九侗敷

邑庠生 賜監議敘知縣卽用娶黃氏侄徵太學生早卒娶張

氏儁敷太學生出嗣鶴弟娶儲氏仔敦太學生娶王氏俱不孝

熊詔出健敘娶徐氏鳳詔出位敘聘陳氏鯉詔出偉枚聘許氏

倚敬聘劉氏傳敬幼未聘俱鳳詔出孫女十一不孝熊詔出者

三鳳詔出者四鶴詔出者一鯉詔出者三曾孫四壽男侗敷出
彙男佺徵出智男侗敷出貽男儁敷出俱幼未聘不孝熊詔創
巨痛深神昏思瞽語無倫次掛一漏萬伏祈大人先生俯賜採
擇錫之琬琰以登史乘以賁泉壤世世子孫感且不朽

祭文

祭勵母紀茶人文

湖詩書之世澤毓嘉質之徽柔痛修齡之未逮聞懿風而涕流
繁伯姬之苗裔追前軌以相伴肅黃門之家範幼婉婉而幽修
寶靈珠之在握爲賢姑而相攸維文恪之愛子頗慎選夫好迷
欣兩美之既合乃無嫌乎河洲奉盤匝而毖飭潔蘋藻以薦羞
佐敬養其內備終溫惠而無尤逮姑嫜之遘疾竭焚禱以上求
繼高堂之易簣歎佳婦以瞑眸洵相夫而有禮助膏晷之旁搜

趙妻李公膽囊卷第一

子

888

覩成章而心喜託曠業以懷憂會卯辰之屢捷猶助勉其勤謀
既中祕而受渥且禁直而登優惕尚職以冰葉戒凌雜之勿詆
惟中饋之是主酌豐儉而咸周隱自安於食淡斯百爲之善籌
若尙方之隆錫必莊拜而珍收遵大體以立議思仰答之難酬
暨內外之無閒和姊娣於同儔撫嬌甥如己出資奩具而盈稠
兼無妬於貳室似高柯之下樛羣二索而誕育常顧復之悽悽
衍單緒於綿甍宜懿矩之長庥何二豎之不想虔祀佛而無瘳
竟悉奄平五蘊均夢幻於浮漚拜 賜額之榮寵疆伏枕而叩
頭忽奄然其遐逝先夫子之旋騶曾不及乎永訣悵視舍之無
由慘嗒焉於總帳尤淒清於凜秋 忝承乎年譜日侍訓于應
劉接話言之藹郁聆述行之綢繆瞻起居而抱疚心怵怛而弗
休賦雲鸞之渺渺悲夜魄之悠悠倘西極之返顧乘泰素以神

遊鑿椒漿之前爵及肴核之旅修駕第帷而來格席誠感而延
留嗚呼尙饗

祭楊年嫂田恭人文

嗚呼寶婺星沈瑤池駕杳作配玉堂之彥生前象服堪榮永留
彤管之名身後芳徽不泯悵女宗之乍失誦壺範而增悲緬惟
恭人順表坤儀貞稱恆德家承恩澤漢初樊鄴之封產自名門
唐世崔盧之族幼嫺姆訓顧家之閨秀爲隣長習女功薛氏之
鍼神與匹荆花方茂玉鏡斯求旣協兆於雀屏乃嗣徽於鳳卜
宜家入而有譽相夫子以成名潔治灑滲翬翟佐斑衣之戲靜
諧琴瑟雞鳴理雜佩之遺禮肅如賓能使伯鸞加敬職勞中饋
不教洗馬言愁冀北空羣雙珠早誕關西清德四世益隆載邀
鸞誥之自天爭羨魚軒之耀路尊榮未艾勤儉依然方期克享
修齡詎意遽逢疾益壽之泉罔效返魂之藥無靈孫楚有文
情深伉儷曾參至性口絕水漿里巷盡爲歛歔族黨尤多悼歎
某等誼辱蘭交心儀蕙質因風柳絮未聆道韞清言倚玉蒹葭
得悉大家矩步追躡承華之列自愧後塵備員載筆之班敢揚
懿行些音愴咽珮響歸遲靈其來歆嗚呼尙饗

祭大同守洪崑霞年兄文

嗚呼兄之捐館舍距今將一朞矣余至今日而始得爲文以哭
兄者非余之敢後也去冬之杪凶問至京師始聞而驚繼而痛
轉而疑以爲傳之非其眞耳欲哭於寢門之外而未敢也今春
訃至而疑者信矣痛不可忍矣卽欲走一介執雞絮哭於喪次
而余適爲同官所擠因事彈中吏議欲寘之死將下於理幸

天子知其枉僅從削職仍供奉禁廷當是時一夫張弧舉朝袒

臂余杜門待罪如孤萍斷梗飄泊於風濤險隘之中恐終已不得哭兄以伸吾痛也勉強索紙作書而茫茫百端不能成一語以故盡然中止未幾扈從塞外持橐簪筆無餘閒又遲遲未逮今聞窀穸有期矣旣不能憑棺而視歛復不能執紼以引車日月云徂幽明永隔數千里外臨風一慟其能已於言耶始余之得交於兄也在戊寅之冬皆以滄陽夫子選拔士入京師時則又有王子庭曙大武舒子寶田旅邸連楹而余居獨遠一見歡如舊相識卽徙余同寓於正陽門外之僧舍相與圍爐翦燭論文賦詩更縱談古今賢豪之出處及品評當代人物輿至則飲酒歌呼以爲笑樂蓋五人者方俱壯年氣盛志高因相謂曰異日富貴毋忘死生勿易也已卯秋余偕大武舉京兆而兄與庭曙寶田屈抑不得志寶田先歸江南兄與庭曙被選上舍教習

趙襄善公賡書卷第一

三

60

八旗俊秀兄又暫歸越明年大武成進士余下第先後出國門而庭曙獨留京師於是五人者盡散而各一方每當風雨雞鳴索居斗室思從曩遊邈不可得然後歎知己聚合之難而友朋樂事之不常有也癸未余上公車兄與庭曙大武俱在京師復相聚者數月次歲兄至毘陵與余踐婚姻之約庭曙大武爲之執柯復一聚於吾郡是冬余赴長沙過維揚兄偕難弟孝儀邀至其寓齋庭曙亦至乃命酒徵歌放舟隋堤爲歡累日此一歲之中得再聚焉丙戌大武方官西曹兄亦以選人需次余循例避南宮試不得已旅食京師復日相往來慰我羈客窮愁之況然而寶田戀於其鄉庭曙又居憂未闋僅吾三人者盤桓於茲已淒然有寥落之感矣閱數月兄授交城令當之官余送出郭握手丁寧以爲雖暫相別不久卽以最遷可復相聚孰謂此別

遂成永訣也兄在交城時一月中書問必再至凡地方利弊若何官箴得失若何輿論傳聞之衰貶若何諄諄咨詢不憚煩其後牧霍州也亦然又其後守雲中也亦然余以日侍直廬辰入酉出偶不暇答而兄書問不絕且云吾兩人遙相念止欲數行書達彼此平安信耳兄素知我貧歲必分俸數十金爲芻馬僕賃之費又憐余薄宦三載尙寄跡僧寮僦居無策復爲假貸以助焉嗚呼兄之待我厚矣而余曾何有毫髮之補於兄耶自兄之別我而去京師也後四年大武出守章貢不半載卒于官余哭之庭曙則又四至京師兩年前卒於京余又哭之昔日之相聚而相知者又有金子以時去年春亦卒於滇余又哭之不一而足而又哭兄也嗟夫死生聚散之際固如是其奄忽耶以時年長而兄與余齊年庭曙少余數歲大武又少庭曙數歲回憶戊

趙妻寧公贍墓第一

重

寅舊遊不過二十年閒事而故交零落已如此其幸而存者惟余與寶田然六年之間余哭四人焉而余亦將衰矣兄在雲中卽得疾余亟馳書慰問答書云調治已漸愈繼遭太蒸人之喪疾復發余遣人弔且問疾亦答云體漸平復然余見來書筆墨語言似有精神恍惚之狀心竊憂之尋聞南歸抵家疾發卽瘥余憂乃少釋謂居家逸不若居官之勞善自攝養可以無恙兄之仲子封旅吾壻也去春來京師亦云眠食無損矣孰意不逾歲而終以此疾至於不起哉又聞兄之疾因余弟而加劇也蓋余仲弟守太原與兄共事交契最深今以得罪上官陷於重法含冤茹枉控籲無門惟兄熟悉其情事必有爲之憤懣不平者嗚呼兄已棄人閒世一載矣而余弟尙幽羈請室未知性命安歸余痛吾弟能勿益痛兄耶近世士大夫往往家於官兄之家

則以官而廢三任晉中廉聲籍甚宦橐如洗復傾家以代人補
直沒後遺孤十一人未婚娶者過半非有難弟孝儀推己所有
佐其兄則受累於官者無終期而藐諸孤且饗煢不給也夫今
之人不講於孝友之道久矣家有孝友之君子同室無私財撫
兄子如己出九原有知亦何憾乎吾壻封旅頗能自刻苦他日
庶有以自立余于兄尙有所負俟余力可以償當付之封旅以
完吾志此平日所欲告兄而未及者也嗚呼哭兄之淚蘊結一
年而所以爲兄告者不過如是言有盡而意無窮冥冥中之知
我豈遂不如疇昔相聚之時也耶哀哉尙饗

祭 誥封一品夫人李師母文

天壽平格元老是毘內政肅離日維母儀女宗紀美五紀於斯
條承遠訃理不可推恭聞懿行冠於閨帷晉江巨姓朱紱垂垂

趙襄公贖臺卷第二

書

古文三

令善宣昭筭珈孔宜崇秩極品德稱弗疑繫惟相國出應昌期
文武勛德蔚爲邦基內修其勤嘿若相之惟 帝念功端揆來

咨弼諧單心罔顧於私家督孰理截然不移維我相國忠清勿

欺素心如水皎皎不淄家承其廉潔盞滌匱困倉誰糜文錦胡
被貴而弗驕禮以自持維我相國燭照靡遺四海九州罔不受

治家承其明毫末悉釐家人婦子莫敢噤嘻紀綱僕御順令無

疵大家之教典則靡戲申國之法莊恪弗劇豈同臭味而有差

池順承合德麗於坤維母訓既立諸子是規叢桂清芬五株森

奇巫咸同招劬勞心悲長公滄粹文高一時經術湛深不克究

施惟此蘭蓀九畹方滋敦敏性成誦習孜孜有孫有曾克承燕

貽朝夕顧視樂以舍飴春秋旣高登邁於耆睽念鄉閭歸憩在

茲宜履上壽飲食支頤遲公林泉采采巖芝輕輿載軒委蛇相

隨何圖仙籍與世長辭舉國心悼疑天噏熾凡屬宇下泣涕漣
漣某等溯風鳴噎道遠莫追或源伊維比附孫枝或承牆廡瞻
望親慈或拜牀下摯誼惟祇無從執紼心傷涕洟杳杳南天曷
慰我思雖云大德蠡管難窺潛焉寫哀抒此寸詞踧莫椒醕將
以瑤卮雲車僊僊來鑿來綏嗚呼尚饗

祭銓部張鞠菴文

嗚呼庭生玉樹代卜金甌譽綿弓治緒振箕裘地靈人傑燕翼
厥謀霞鬱雲蒸世德是求穎南擢秀曲江匹休維君望族閎閱
罕儔太翁起家冠冕時流爲名進士發祥所由青萍出匣屠龍
志酌含香粉署楓宸眷優尊鱸早嗜綠莖歸游千里名駒步
武驂駟桂叢香發杏苑花稠英年射策如矢汰駟扶搖羽翮廊
廟琳瓊旋入承明職典使輜皇華四牡咨度咨諏六載考績

趙義萼公騰墓卷第一

三

688

帝嘉乃歆游陟銓曹亮采惠疇嗣遷郎正引對螭頭天語春
溫謂拔其尤掌頌制誥茹剛吐柔待錫新綸星躔未周胡然化
鶴倏焉駕虬君稟夙慧庭訓冥搜攷漁墳典沈酣索邱提攜玉
友勛以藏修分衡鎖院奇俊畢蒐自官京師漳鄉路悠望雲子
舍祈添海籌蘭芽瑜珥繞膝扶鳩叔季鵲起懷珍北遊田荆姜
被指日綢繆何其不弔朝露溘收笙遙緜嶺文召玉樓錦茵撒
兮荀香暗浮瓊花謝兮子規夜愁韶光石火天地蜉蝣名場噩
夢滄波逝漚山邱華屋瞬息千秋某等盍簪輦下締譜同舟聚
散如斯慟哭西州生芻一束清醑一卣靈其降鑿詎隔明幽嗚
呼尚饗

祭二弟文

維康熙五十七年二月廿八日同懷兄某以酒一卮飯一盂紙

錢一陌遙呼二弟而哭告曰痛哉痛哉天何使吾弟至於此極也廿三日晡後聞信以來余與四弟淚眼已枯驚魂未帖展轉思維誠不料吾弟至於此極也上年十月之前無日不慮有此事至十一月廿六日啟奏 天威震怒欲允九卿之議時已萬無生理及暮而復折本次早余從父親匍匐 宮門哀籲卽下九卿議覆而亦折本 天心微轉似有生機謂自此以往可以不死矣今年正月柯參戎有人西去家書中作好言相慰彼時情形實然非欺語也孰意今月廿三日折本忽上 聖明遍問執政皆云國法不可寬而弟竟死矣假令是日不奏則遷延旬時或可以不死卽不然而緩之數日則三月停刑此月猶可以不死弟之竟死於此月也執政 爲之也誠知其如此則前月之家書便勸令自裁猶得全首領以沒而何爲以好言相

趙養公贖墓卷第二

美

八十八

慰也痛某有極哉悔其有極哉 旨下之後父親方在闈中一求不允再求何益旣不敢復哀叫於 九閭又不能馳急足於千里廿四日遣萬本西行計其到時弟已不及待故未發家書是此段情形吾弟遂終已不聞也今爲略述之一紙淚言九原其得見耶廿五日部文下廿八日當抵太原是日遇齋戒廿九日卽吾弟畢命之辰矣出獄之狀若何臨刑之慘若何棺衾不能豫辦裹殮豈能如法守尸何人寄襯何地數日來一日九迴而予腸亦寸寸斷矣吾弟平時一切吉凶先期有夢徵今日之事母親暨弟婦能攝魂魄而先告之否晨夕與獄神相對舉陶有靈肯垂憐而示之兆否嗚呼痛忍言哉雖然夙世劫緣人誰無死死於牀簀死於市朝均一死也勿苦勿怖黃泉差樂何怨何尤 本朝七十餘年培養士氣冠帶之倫苟非極惡大懟概

邀寬典從未卽加刑戮今吾弟獨遭此厄天也天可逃乎且吾弟被叅之後朝野聞之每多婉歎則含冤負屈而死猶勝於情眞罪當而死也查追家產一本尙未奏請異日倘邀君恩寬貸得留寸椽尺土則煢煢眷屬便可南還挈弟之棺及考姪之棺歸與弟婦之棺暫厝先塋之左近俟卜一兆而合窆焉弟所舊居之室子女聊可棲身教諸子以望其成養諸女以待其嫁余與四弟此身尙存決不使幽魂遺恨於地下也揮淚作此以補前日之家書冥冥中不致浮沈吾弟見之或可瞑目長逝矣嗚呼痛哉

祭岳母陸太安人龔太君文

嗚呼岳母竟溘焉長往耶年踰八袞壽不爲少子姓滿前福不爲薄考終寢室洒脫塵緣人生至此亦復何悲然余之所以不

趙襄公謚墓卷第二

三

八十一

能已於悲者則以母視余猶子而余不得視猶母也蓋母出自名門嬪于華胄識詩書明義理巾幗而有丈夫之志爲先太岳翁觀察公所器重乃屯難頻乘世業中落齎志以終天年其胸中鬱結幽憂之隱有不能爲子女家人告者余小子聆音察色知之最深方謂彼蒼嗇其遇而豐其年可以坐享期頤上壽余乞身歸田猶得進旨甘承色笑而不意遽棄捐於今日也憶甲申之冬余趨侍家君於南楚旋以薄宦滯京師與母不相見者凡九年余之婦乃母愛女也不忍使之遠離癸巳夏挈女至京師余具冠帶拜謁母爲一解顏雖寓居湫隘脫粟藜羹處之怡然余又僂直禁中扈從塞外不獲長侍左右歲不過半載月一再至邸舍定省家君因得問母起居計母居京師三年而余之與母相見者不及月餘屈指再留三年當爲母稱八十觴乃丙

申夏婦兄堅請南歸家君力止之母亦躊躇未決而重違子請不得已洒淚就道余送出國門扶輿泣別母猶強歡笑相慰謝不謂此日遂成永訣也嗚呼痛哉先王父與太岳翁爲同年友相約爲婚媾余生癸卯越一年余婦生遂締姻焉先母夫人與母同族也閔子不造髫年失恃哀悸成疾母日遣人視問餉之藥餌乃得瘳年十五補弟子員母爲製青衫送學又三歲家君欲授室而貧不能娶母因館甥於家衣之食之如己出余潦倒諸生二十餘年母常顰眉太息迨己卯上賢書己丑倖及第母輒喜曰壻自幼不凡遲之至今始見其成名吾相攸無憾矣嗚呼母誠視余猶子也追念舊恩依依如昨能不思而痛痛而長慟哉余家查產一案波及三黨邑長吏耽耽逐逐擇肥而食虎狼四出羅織無辜母有饘粥田數頃併籍於官且陷婦兄於獄

趙襄公賸囊卷第一

天

八八上

餬口之計將絕母郵手書示女曰女勿憂若兄亦不汝怨區區薄產譬如昔年作汝奩資可耳幸荷 皇仁寬免各產仍歸其主而貪吏亦以暴病死去歲余奉 命從戎母聞欷歔不自勝手書來云王事賢勞臣職應爾其如寒官無力何且吾老矣萬里征人可復相見耶嗚呼余無以報母而反以累母更以遠役爲老人憂其相負尙可言哉今年五月余甫入關回酒泉浹旬得都下家書知母有凶耗而訃未至然鄉人音問皆云然嗟乎其信然矣欲如曩日之聚首蝸廬絮絮述家常話不可再得矣病不知何證卒不知何時彌留不知何語殮不能憑棺以整衾穉祖載不能執紼以引輶車窆不能臨穴以襄其窆窆關山遙隔生死長辭母誠視余猶子而余終不得視猶母也嗚呼母止一壻雖有如無若此徒使桑榆日暮望遠懷悲骨月天涯九原

不瞑人生世上亦安用兒女爲哉母之愛女哀毀不欲生將匍匐南行送母之葬跋涉數千里恐不及事母鑒此情或不增其怨恫也哀哉尙饗

祭署理西安將軍額公文代

大清康熙五十八年歲次己亥四月己巳朔越十二日辛巳撫遠大將軍王謹以剛鬣柔毛之儀致祭於署理西安將軍印務湖廣總督額某之靈曰嗚呼欲惡莫大乎生死綱常首重夫忠孝然生死之所遭有順逆忠孝之所成有大小若備員于朝考終於室歿不足道存無可述死而徒死者無論已卽智效一官能盡一職鄉表其閭邑食其德雖能生誌乘之光未足立顯揚之極若夫景行已而有恥疾沒世而無聞臨大節而不奪無求生以害仁光被山河入地化萑弘之血位乎箕尾歸天爲傳說

趙表夢公臚彙卷第一

三

八十三

之星死而不死如將軍者其人矣將軍世作朝勳家傳將略才稱虞陞之夔龍任畀荆蠻之鎖鑰乃以小醜背恩猖狂荒服職授龍驤權分虎竹將軍則勇奮於心義形於色忿此狡焉以啟疆逝將滅此而朝食視士卒如一體唐勳可奏乎汾陽謀舉動於萬全漢策莫良於充國有虔秉鉞分道揚鑣礪劍崑岡之石洗兵蒲海之潮雲罕星羅彌天旣布釜魚籠鳥穴地難逃何期豎子貪功鄙夫被惑重地遙臨短兵近接日暮途窮羽書火急同患爲懷懸軍深入蓐食飛馳革囊利涉轉戰無期相持浹月獨木兼支長鞭莫及矢必命中而後發兵則一夫而當百尙制勝以設奇每摧堅而擊實乃敵人懼遺後患計欲生擒起傾國之眾置等身之金檻羊並力奔獸同心飛矢於壘伏礮於岑陣餘雪擁戰苦雲深將軍猶裹創而陷敵楊腹以先登斯時也士

馬爲之嗚咽鼓角爲之悲涼原野爲之變色天日爲之無光將軍雖摧敵百重圍而身受十餘創矣但見彼眾益增我軍漸折短髮蓬飛雄心氣結痛主恩之未報悲臣力之已竭於是望北闕以長辭引龍泉以自決握拳透爪顏平原死不忘君嚙齒穿齦張睢陽鬼猶殺賊所以大宛小月咸灑淚於龍沙因而賊子亂臣亦痛心於馬革者也嗚呼星隕人寰計聞天表百辟咨嗟九重震悼爰命本王恭膺天討馬牧三邊兵分十道伸將軍未竟之志慰聖主如傷之抱縱鴻毛蔽野何能當烈火之焚諒敗葉凌霜豈足敵颶風之掃茲本王節駐湟中誓師西徼遙望風雲爰伸祭弔嗚呼將軍其死而不死者耶於忠也舍生取義爲我皇父社稷之臣於孝也殺身成仁爲爾先人堂構之子嗚呼將軍其死而不死者耶雖酌天酒以報崇功昭代之褒榮未艾而列庶饑以景芳烈本王之哀感良多乃復爲招魂之歌歌曰華戎相去兮萬里隔上下攸分兮天與澤來享來王兮奉天職作不靖兮乃自絕嗚呼將軍兮明大節從容就義兮尊中國羌部聞風兮心膽裂英氣如生兮懾西域魂兮歸來兮來歆格銘鼎鐘兮炳史冊親顯名揚兮永無斃哀哉尙

饗

趙義萼公贖藁卷第二

三



浙江書局刊

張大昌校

姚煥校

趙葵叢書卷第二

三

又文

